

DISSERTATIO INAUGURALIS MEDICA,
DE

NATURA VITÆ ET SANI- TATIS FORMATRICE,

Quam,

AUSPICE DEO PROPITIO,

Et Consensu atque Auctoritate Gratiſſæ Facultatis Medicæ,

IN ALMA REGIA FRIDERICIANA,

P R Æ S I D E

DN. D. MICHAELE ALBERTI

ACR. MAJ. REG. BORUSS. AULICO ET CONSIST. MAGDEB. CON-
SILIARIO, MED. ET PHILOS. NATUR. PROFESSORE PUBL. ORDIN. ETC.

DECANO SUO SPECTATISSIMO,

Domino Patrono, Præceptore ac Promotore suo omni honoris cultu prosequendo,

PRO GRADU DOCTORIS

SUMMISQUE IN MEDICINA HONORIBUS ET PRIVILEGIIS

DOCTORALIBUS LEGITIME IMPETRANDIS,

HORIS LOCOQUE CONSVETIS,

ANNO MDCCXXXI. D. JANUAR.

PUBLICÆ AC PLACIDÆ ERUDITORUM VENTILATIONI

SUBJICIET

R E S P O N D E N S

CAROL. CHRISTIAN. SEIDEL,

BEUTHENA-SILESIUS.

HALÆ MAGDEBURGICÆ,

TYPIS JOH. CHRISTIANI HENDELII, ACAD. TYPOGR.

ILLUSTRISSIMO DOMINO,
DOMINO
FRIDERICO IOANNI
CAROLO,

SAC. ROM. IMP.

COMITI A SCHOENAICH,
LIBERO BARONI BEUTHENIENSIS
TERRITORII,

LIBERÆ DYNASTIÆ, QVÆ EST IN SILESIA
CAROLATHI ET BEUTHENÆ AD VIADRUM,
AMBTITII, STARGARDIÆ, DOBERÆ, MEL-
LENDORFFII, SCHLAUPITII, BEITSCHII, TAR-
NOVIÆ, PADLIGARIÆ, OSTRITII ET
GERSDORFFII HÆREDI.



PROOEMIUM.



Quando Naturæ scrutatores ac observatores *Galenus* indicare & commendare laborat, tunc in *Lib. natural. facult. cap. 13.* ita eloquitur: *Hippocrates* omnium medicorum & philosophorum primus, ut qui primus naturæ opera novit, hanc semper tum admiratur, tum prædicat; quam & justam nominat & solam animalibus ad omnia sufficere dicit, ipsamque per se sine doctore, quæ opus sunt, agere: nec tamen hic adeo honorifice de Natura sentit, sed plurimi Physicorum ac Medicorum hanc naturam, utpote singularem & celebrem causam motuum & mutationum agnoscunt, quamvis multi quoad acceptionem vocis discrepent; ita ut *Hippocrates* variantes illius significatus, sub discrepantibus etiam prædicatis proferat, interim naturam corporis, videlicet humani & naturam corpoream provide ac judiciose discernat: sic porro *Stur-*

mius in diff. de Naturæ agentis idolo cap. 1. §. 1--5. ex Aristotele sex significationes Naturæ allegat: *vid. Aristot. Metaphys. Lib. V. c. 4. Piccolomius Lib. II. p. 249. Peverius Lib. 7. Phys. c. 1. Fonseca Lib. V. metaphys. c. 4. qv. 1. l. 2. Bravo Consult. Med. VII. §. 9. Smetius Miscell. Lib. 7. ep. 1. §. 326.* attamen quilibet docti selectum peculiarem in differentiali Sensu instituunt, unumque præ altero digniorem ac veriolem æstimant, adeo, ut interdum Naturæ notio proprio, aliquando improprio significato prædicetur: & hæc diversitas quoad acceptiones vocum hodiernis adhuc ævis continuat, ut ea propter quidam neotericorum ultra crepidam sapere videantur, qui de priscis Philosophis & Medicis frivole judicant, quasi in vera naturæ interpretatione & agnitione ignari & stupidi fuerint; quamvis hodiernum adhuc circa hanc disquisitionem manifestæ vigeant confusiones, contradictiones & oblocutiones: ob id aliquibus consultius visum est, quo notionem Naturæ, quam modo barbaram, mox metaphysicam, nunc æquivocam, alibi sonoram omnique reali conceptu ac respectu destitutam, aliquando confusionum matrem, asylum ignorantiae &c. &c. nuncupant, abrogent & ut sibi persuadent ac opinantur magis reales, distinctos, perspicuos & applicabiles respectus atque conceptus de causis motuum proponere nitantur, sed dum suis promissionibus aliorumque expectationibus satisfacere contendunt, trabem in propriis oculis haud advertunt, ac præternuda asserta vel nullas, vel levissimi ponderis rationes & demonstrationes proferunt, adco, ut æqui arbitri de antiquorum & neotericorum plac-

placitis, quoad hoc subjectum judicantes, facile plus falsis in illis, furfures vero ac fungos multos phantasiæ in hisce inveniant: Laudantur & commendantur rerum, causarum, virium, relationum, mutationum & effectuum naturalium indagationes; quid vero natura, præcipue particularis, sit, aut condigne minus inquiritur, aut quoad explicationem negligitur, ambigitur & confunditur: Et quid mirum esse potest, cur in principali hac causa tantæ fluctuent controversiæ! siquidem reliquarum considerationum naturalium æquales circumsonant fluctuationes, hæsitationes, ac opinionum variationes: & tales cohortes dissentientium opinionum physicarum minime ququam deterrere debent, ut veram, certam ac indubiam naturæ scrutationem, acceptionem & interpretationem deserat vilique pendat: Gloriantur quidem eximia ostentatione hodiernis ævis multi physici, quod circa hanc *Naturæ* indagationem multis parasangis veterum, ut judicant commenta, insomnia, superstitiones, asyla, figmenta, traditiones, fabulas, verba, ac opinionum monstra, superent, effectus vero, qui naturæ adscribi solent, magis solida ac perspicua ratione ex legibus motuum, viribus materialium, relationibus corporum & actione ac reactione corporearum substantiarum demonstrent, ita, ut præter principalissima illa subjecta physica, Motum videlicet & Materiam, nullum aliud distinctum, aut separatum subjectum pro Natura agnosci & explicari debeat, nullo habito respectu ad confusionem, quæ cum causa efficiente, instrumentali, remota, impel-

lente & effectu committitur; ut propterea juxta hodiernum stylum natura in diversa modificatione motus in materia & per hanc consistat; proinde etiam judicioſa cauſæ principalioris, efficientis videlicet, indagatio & æſtimatio vilipendatur, congruum motuum directorium negligentius inquiretur, ac vera finium & reſpectuum finalium explicatio aut obliteretur, aut tumultuarie tractetur, inſuper rationalis ſubſummendi, connectendi & concludendi ordo, crasse violeretur & nude verbosa ac imaginaria inventione ac declamatione monſtrum aut chimæra pro natura & fun-
 gus pro cerebro pro- & exponatur: Ut ut vero decies ac toties ex aliis conſideratu dignis rationibus, phænomenis & effectibus verus naturæ ſenſus commen-
 datur, multi tamen moroſo vultu & aſtero ac invidioſo animo illum proſequuntur, ut huc quadret illud *Horatii ep. 10. v. 24. Naturam*, videlicet talium ad-
 verſariorum, *expellas furca, tamen usque recurret*, i. e. livor, rancor & odium contra naturæ benignæ ac providæ opera ſemper innovatur & continuatur: quan-
 do itaque rationalis, provida, ac judicioſa in quibusdam ſubjectis indicatur & demonſtratur natura, multis hæc aſſertio bilem movet, ut mordaci oblocutione hanc naturam inſultent, ac juxta *Tertullianum ad-
 verſ. Valentinianum c. 29. & Caſſiodorum Lib. IV. ep. 38. ſuæ naturæ immutabilem ac irreformabilem contineant naturam*; quibus etiam ſecundum *Senecam Lib. 9. con-
 trov. difficile eſt ſuam naturam* ratione ac conſilio deſtitutam, *effugere*: & dum prudentius, æquius & honeſtius videtur a rationali natura regi, quam a poten-

potentiis, influxibus & impulsibus materiæ dirigi, ita nihilominus de multis prædicari debet *Senecæ* effatum *Ep. ii9. Natura*, nimirum ita sentientium, *contumax est, non potest vinci, suum pascit*, i. e. naturam corpoream posthabitis singulis rationibus statuunt, inque eo sibi perplacent, quod ex corporum affectionibus tale dogma speciosum adstrui queat: Haud tamen quempiam hic sentiendi & judicandi mos detertere potest, dum in hoc mundo absoluta conformitas & consensio animorum expectari haud debet, sed quot sunt capita, tot etiam sensus manebunt: illud interim cujuslibet officium est, ut sententiam aliquam, aut judicium quoddam perspicue referat, solide demonstret ac confirmet & ad congruos usus applicet: Haud quidem nobis hac declaratione sermo est, de *Natura* universali, quæ meditatio nimis ampla & diffusa esset, sed potius pro nostro scopo de *Natura humana* disquisitionem aliqualem instituemus: hæc enim illud pomum Eridos est, quod in foro Medico varios dissensus generat: & quid magis ridiculum & a sana ratione alienum esset, quam si ob talem dissensum odia, invidiæ, cavillationes, lites & inimicitia irreperent; cuiuslibet enim dictum & liberum est, *πάντα δοκιμάζετε, ὃ καλὸν καὶ ἔχετε*. i. *Thest. V. v. 20.* & *εἰς ὃ δοκιμάζειν ὑμᾶς τὰ διαφερόντα*, *Philipp. I. v. 10.* unus quisque itaque in proprio sensu plene persuasus sit: *Rom. XIV. 5.* nemini enim sententia quædam five vera, five erronea sit, obtrudi debet. In hac spinosa ac intricata disquisitione nos impræsentiarum tentamen facere & Specimen Inaugurale de NATURA VI-

TÆ ET SANITATIS FORMATRICE edere placet, ut Sensus hujus causæ magis diserte, perspicue ac solide inclarescat: Huic conatui ut DEUS T.O.M. qui ipse est veritas, ex almo benedicat, eumque ad exoptatum usum dirigat & promoveat, est quod in primo hoc accessu devotissimis precibus contendimus.

§. I.

Discursum de *natura humana* nobis instituentibus, in primo limine in mentem incidit *Galen* effatum de *Ufu Partium Lib. 9. c. 16. quod millies*, ipse ait, *jam monstravimus, id nunc quoque ostendemus, nihil a natura fuisse prætermissum*: enim vero multis occasionibus *opera & effectus Naturæ*, quos *consueto* ordine, juxta *divinam* institutionem administrat, commemorata & commendata sunt, inde etiam *facili* studio, nisi *præjudiciis* plus favere placeat, *concludere* quisquam potest, *quænam* natura sit & *qualis* causa *hoc* nomine *digna* existat, ne *perversis* opinionibus quaquaversum trahamur, neve *justos* causarum ordines frivole, ludicre & sciole turbemus, ac causas *instrumentales*, *mediatas*, *efficientes*, *formales*, *essentiales*, *accidentales*, *materiales*, *finales* &c. perperam confundamus; neve *qualitates* & *relationes*, aut ut interdum nuncupari solent, *vires materialium*, ut & *motus* in & cum *materiis* decurrentes, ridicule commisceantur, indeque *monstruosa* & *androgyna* natura fingatur: quam ob rem in hac disquisitione prudens & rationalis respectuum *distinctio* commendari meretur, ne sub *confusa* illorum æstimatione-

matione, in uno phænomeno nunc *irrationalem* & materialem, in alio vero, quando consuetæ cogitationes & opiniones nos deferunt, *alterius* essentiae, indolis, potestatis & profapiæ, *naturam* in *subsidium* ducamus: huc quadrat monitum & diæterium apostolicum *Ebr. XIII. 9. doctrinis variis & peregrinis ne circumferamini, bonum enim, gratia roborari cor. conf. Exc. Stablii Progr. de Constantia Medica*: quemadmodum itaque *constantia* in cognoscendo & iudicando inter eruditos *virtus Heroica* est, ita circa *Sensum Naturæ* eximia inconstantia, animi levitas & vagabunda incertitudo passim observatur, ut *multiplex* & eminenter *contraria* Naturæ acceptio in foro *medico* passim etiam deprehendatur; nec tamen *perinde* est, pro *lubitu* hanc, aut aliam *Naturæ* acceptionem amplecti velle, sed interest præcipue in *principali* causa, unde demonstrationes & *deductiones* formantur, *certitudinem* possidere; frivola enim est provocatio & excusatio, quod nihil referat, si medici in rei *cognitione* discrepant & *dissentiunt*, modo in ejus *tractatione therapeutica* convenient: quod posterius æque minus *congrue* contingere potest, ni talis ars Medica periculosam magis ac perniciosam *Empiriam* oleat: neque etiam præsens nostrum institutum est, *diversos* naturæ significatus enarrare & trutinare, quæ *diffusa*, ex parte etiam *odiosa* & otiosa esset occupatio; in eo vero allaboramus, ut pro *nostra* cognitione indicemus, quænam in *Medica* Scientia *Natura hominis* agnoscenda veniat: quod si enim in *positione* & *demonstratione* aliquam naturam probaverimus, facile hæc assertio in *opposito*, aut antithesi agnosci ejusque *veritas*, firmitas & perspicuitas comprehendi poterit, modo non pertinacia, morositate & studio contradicendi quisquam

animum suum indurare & in Sole cæcutire gestiat: Quemadmodum itaque veritatis cupidus animus non modo in cognitione *effectus* acquiescit, sed præcipue in *causam* ejus scrutatur; ita *judiciosi Medici* studium est, non *fluctuantibus* opinionibus *aliqualem* Naturæ notitiam assequi, sed ex *vero fundamento* illam agnoscere, nec hanc cognitionem pro *fallaci* & erronea declarare, si captiosæ, inutiles & ludicræ quædam subtilitates in hac doctrina, non crassis, *palpabilibus* & in *crudos sensus* incidentibus conceptibus propalari possunt, cum verum etiam existat *Plinii* ef-
fatum *Lib. 17. cap. 16.* quod *non omnem experimentis assequi* queamus *naturam*; cum multi processus, inventiones, fines, destinationes, directiones, operationes intrinsecam *subtilem* naturæ activitatem & *modificationem* comprobent, quam multitalibus prædicatis concelebrant, quæ *corpori* hujusque affectionibus tribui haud possunt, sicut sunt *Lusus* Naturæ, *Natura benigna*, *provida*, salutifera, *medicatrix* &c. siquidem in variis *fonticis* operationibus, si ridiculæ fictiones, lepidæ tergiversationes, aniles imaginationes, sciolæ speculationes, aut verbosæ narratiunculæ vitantur, natura longe *alia*, quam *corporea* agnosci debet, quæ potius effectus tales, ferme mirabiles, *rationali* quodam directorio ac moderamine producit: quippe quæ generales considerationes facile comprobant, quam *necessaria* ac *fructuosa* in foro *Medico judicio* *Naturæ* indagatio existat.

§. II.

Quando *Naturam Vitæ* ac *Sanitatis formatricem* nuncupamus, tunc hanc assertionem cum illa connectimus, quam *Dn. D. Præses de Natura Morborum medicatrice* publice

blice etiam commendavit & explicavit, proinde etiam asseveramus, quod *Vita & Sanitas* tanquam ordinaria *naturalis* qualitas ad *integritatem* corporis humanis usibus inservientis, spectans, *peculiarem causam efficientem* agnoscat, a qua utraque, *principali* respectu provenit & corpori communicatur: quemadmodum enim *corpus in se* spectatum, quomodocunque etiam formatum & eximiis ac egregiis qualitatibus *physico-mechanicis* præditum, ex *fibris & vasis*, ex *fluidis & solidis*, ex *subtilioribus & crassioribus*, substantiis compositum sit, extreme corruptibile & a durabilitate, integritate, consistentia & constantia *alienissimum*, indeque *tali* qualitate instructum est, quæ vitæ & sanitati essentialiter *opposita* deprehenditur, hinc illa affectio, quæ vita & sanitas audit, corpori *non* propria, sed *adventitia* est, ob id ad justam & judiciosam cognitionem hominis pertinet & indagatio & demonstratio, quænam vitæ & sanitatis *genuina & vera causa* existat? Et si totus *processus* vitæ & sanitatis in perpetua *mutatione* consistit, ut videlicet constanter a corpore *removeatur*, quod hoc qualitercunque ad *destructionem* & corruptionem citius & efficacius promovere & disponere solet, eidemque reddatur & tribuatur, quod illius *integritati* confirmandæ & augendæ inservit, ita facilis erit decisio, quod Vita & Sanitas certis *motibus* impetretur, adeoque in œconomia motuum *congruorum* inquirei debeat: quoniam vero *hi motus* ex parte *medium* necessarium sunt, quo Vita ac Sanitas *formari*, ac *produci* debent, hinc utrique respectus non frivole & contra principia *logica* confundi debent; nam *causa sine qua*, est quidem *causati causa*, interim causatum hujusque causa æque minus *unum idemque* sunt, ac vita aut

sanitas & *motus* ad utramque obtinendam necessarius, alias facile, sed æque vitiose concludere possumus, sine fibrarum ita dicto elatere non datur motus cordis, sine motu cordis non datur progressus sanguinis, sine hoc non datur se- & excretio, sine hac non datur vita, ergo elater fibrarum, motus cordis, progressus sanguinis, se- & excretio sunt vita: ea propter *altioris* nunc indaginis est, consideratio ejus causæ, unde motus *fibrarum constrictorius & relaxatorius* conveniens & ad hanc corporis *integritatem* conciliandam & producendam *idoneus* proveniat? ubi denuo illa indagatio occurrit, an *corpus sibi ipsi* tales motus *generatim*, deinde in ejusmodi *congrua* proportionem & *modificationem* largiri & suppeditare queat, *uti effectui respondent*? in hac enim consideratione *principalis* disquisitio Naturæ hæret, an videlicet Natura *nude corporea* sit, i. e. in affectionibus *mere physicis* consistat, in sic dictis *viribus rerum corporearum*, in potestate & *relatione motuum & materialium* reciproca, in *regimine motuum per materias & actionem dirigente* motuum in materias, adeoque in *variante* modificatione *actionis & passionis*, nisus & renisus, actionis & reactionis, quippe qui conceptus de Vita ejusque proxima & genuina causa hodiernis receptis theorematibus *physico-mechanicis* respondet: utut vero satis *speciosa* hæc videtur sententia, præcipue si simul provocatur ad *voluntatem & potestatem Dei*, quasi *tali ordine* atque processu *vita animalis* niti debeat, dum corpori illa *exquisita dispositio mechanica* concreata & communicata est, ut per hæc qualitates, in testimonium *divinæ Sapientiæ*, vita, corpori adeo necessaria, non aliunde, quam *ex ipso corpore* derivari & explicari queat debeatque: quare cum præ-

clusio-

clusione aliarum causarum vita & sanitas corporis affectio esse creditur: Interea liberum & concessum nobis etiam erit, ut de hac Vitæ & Sanitatis causa nostram mentem exponamus, fundamenta & argumenta nostræ sententiæ humaniter proponamus, ac judicioso & æquo arbitro selectum & decisum relinquamus, nemini vero nostram assertionem obtrudamus, de reliquo si meliora demonstrari poterunt, promptum & placidum nostrum assensum promittamus: Dum itaque de Natura Vitæ & Sanitatis Formatrice disquisitionem instituemus, illud proponere suscepimus, ut ita dictum Principium vitale, sive causam efficientem ac principalem proximam, immediatam & ad naturalem spectantem œconomiam, Vitæ & Sanitatis indicemus, demonstremus & confirmemus.

§. III.

Proximum nunc est, ut illam causam efficientem & principalem nominemus, a qua motus & effectus, ad Vitam & Sanitatem pertinentes, proxime proveniunt; hanc non aliam esse judicamus, quam ANIMAM hominis, a digniori operatione RATIONALEM dictam, quam eandem etiam, utpote principium spirituale, aut incorporeum agnoscimus: huic tribuimus facultatem administrandi & dirigendi motus vitales, videlicet principalissimum illorum, Tonicum, sive fibrarum motricium constrictorium & relaxatorium, ac mediante hoc pulsum cordis, progressum sanguinis & respirationem, deinde motus & functiones animales, velut voluntarium corporis motum, motum sensationis, tam cum externis sensoriis organis, quam propius ad œconomiam vitalem spectantem, quem propterea vitalem nuncupamus, appetitum, vigilias, somnum, ut &

operationes *naturales*, nimirum *concoctionem, se- & excretionem* ac *nutritionem*, hinc *singulorum* organorum, ad tales functiones *necessariorum*, actionem & applicationem *eidem Animæ* adscribimus, quæ *in hoc* officio ac Processu *Vitam & Sanitatem* producendi ac instituendi & continuandi *rationali* modificatione & ordinatione utitur, haud tamen *absolute*, aut ex *necessitate* & constanter *talibus* operationibus *mentalibus* utitur, velut *reflexiva* cognitione, aut *præfiguratione*, *arbitraria* aut voluntaria directione, *præscientia* & *repræsentativa* suarum functionum conscientia, &c. *quales* facultates ipsamet in operationibus *moralibus* ne quidem *promiscue* & pro lubitu *ubique* conjungere & exercere potest, sed certis *limitibus* atque terminis circumscripta est, ut *ultra* suam, a *DEO* adhuc *concessam*, sphaeram progredi haud queat; quare in *œconomia vitali* administranda *tot ac tantis* eadem instructa est qualitatibus, quæ primario & *essentialiter* ad eandem pertinent, cum reliquæ functiones, utpote *superfluae* ac *inutiles* aestimandæ & declarandæ sint, v.g. si anima de *internis* suis visceribus tales sibi *figurativos* ac mensurabiles conceptus formare posset, ac de objectis *extra* corpus suum, quod eadem inhabitat, positis & quædam organa Sensoria *crassius* afficientibus; aut si eadem musculosam *cordis* substantiam æquali *arbitraria* libertate *motibus* instruere posset, quibus *musculosas* ad *masticationem* & *deglutitionem* necessarias partes afficere valet, quales posteriores ipsamet *voluntario* quidem movere, sed *de iisdem* perinde *nullam præfigurationem* formare potest: quam ob rem non concludendum est, licet *anima* rationalis sit *cogitans, imaginans, volens, reminiscens,*
&c.

&c. quod in *omnibus* operationibus *singulas* hasce facultates, pro *nutu* suo, ratione *numeri*, *gradus*, *temporis* &c. simul exercere queat: prout itaque in dignioribus & *principalioribus* actionibus perinde animæ vires sunt *limitatæ*, *restrictæ* & ad certum *ordinem* & *statum* generatim destinatæ, ita frivolum & ridiculum esset in *ignobilioribus* & minus principalibus functionibus, quæ *corpus* humanum attinent & *vitales* audiunt, *moroso* animo urgere velle, quod quia anima imaginativa & arbitrii facultate prædita est, eadem in *hisce* negotiis *necessario* hasce qualitates conjungere & exercere debeat, quas tamen in moralibus *haud promiscue*, aut ubique, conjungere & administrare potest: quid *communione* intercedat inter animæ *patheticas* commotiones, aut *intensiores* mores cum tota *œconomia vitali*, seorsim vero cum *cerebro*, *corde*, *ventriculo*, *intestinis*, *renibus*, toto *genere nervoso*, singulis *musculis* &c. nulli *attento* medico incognitum esse potest; sed quis non pariter advertit, quod illico anima neque hujus consensus aut actionis *præfigurative* sibi *conscia* sit, neque motus tales *deliberato* studio, aut *voluntario* administret, aut pro arbitrio exercere *desinat*: interim illos *actus anima* perficit, (de quibus *animæ*, tam in *genere*, quam *propriæ suæ*, adversarii judicant, quod nil nisi *motus vitales* turbare queat) & tamen *neque volens*, neque *totius* hujus processus *sibi conscia* existit: exinde facile inclarescit, quam *levis* atque *erronea* sit argumentatio, quod propterea etiam *anima Natura humana* esse nequeat, quoniam functiones *naturales* & *vitales* ipsa *inscia*, nec *volente* contingunt, quem *nervum* oblocutionis mox *brevis* annotatione infringere & refellere placuit, quia in eodem *ponderosum*

derosum argumentum & momentum contradicendi quidam ponunt, supponunt & inquirunt, quod tamen vera & *judiciosa* æstimatione leve & vile existit.

§. IV.

Hæc sententia, quod *Anima Rationalis* Natura humana s. *Principium vitale* sit, exacte cum *Sacro Codice* & revelatione divina congruit, quare tantum hoc loco urgeamus *primam* creationem animæ, de qua *Genes. II. v. 7.* extat, quod Deus *in naves* corporis, e *pulvere terræ formati*, inspiraverit, *animam vitarum* & quod homo factus sit in *animam viventem*: hoc dicto indicatur & probatur, quod hac inspiratione corpus *substantiam* quandam impetraverit, quæ antea in eodem non extitit; quod corpus, quoad suas *materiales* i. e. *physico-mechanicas* qualitates fuerit *perfectum*; quod hac inspiratione *nihil materiale*, sed *aliam peculiarem substantiam* obtinuerit; quod hæc substantia nominata sit *Spiritus*, utpote causa *incorporea*; hæc dicitur *spiritus vitarum*: adeoque non unius, sed *duplicatæ* vitæ; vitam vero, quam primus homo una cum hoc spiritu suscepit, fuit cœlestis s. *spiritualis* & deinde *naturalis*, illa comprehendit operationes animæ, *salutem æternam* ac beatitudinem concernentes; hæc vero complectitur commercium animæ cum suo corpore & sub eodem partim *conservationem* ac integritatem hujus corporis in suo naturali & *materiali* systemate & complemento, partim usum hujus *visibilis* mundi, *ministrante* hoc corpore; denique etiam notari debet, quod ab ipso almo Creatore *prædicatum Vitæ* primo *Animæ* & non corpori datum sit: huc quadrant verba *B. Speneri Conc. Funebr. Part. IX. conc. 1. p. 412.* Es hat Gott dem Menschen geschaffen zum ewigen Leben

Leben, Sap. III, 23. Dahin auch gehöret, daß ihm Gott einen lebendigen Odem eingeblasen hat. Gen. III, 7. Damit bekam der Mensch nicht allein das natürliche Leben, sondern auch zum fördersten das geistliche Leben in den göttlichen Ebenbild 2c. *conf. B. Lückemann Vorschmack göttlicher Güte Part. II. c. 2. p. 270.* Zu erst bereitet der Schöpfer den Leib, als einen schönen wohlgezierten Pallast, und stracks darauf führet er einen edlen Gast, die vernünfftige Seele hinein, den schönen Pallast zu bewohnen: & p. 272. Gott bereitete einen Leib aus dem Erden-Kloß, und bließ demselben ein dem lebendigen Odem. Was ist's daß Gott dem Menschen den lebendigen Odem eingeblasen? haben dann die unvernünfftige Thiere auch keinen lebendigen Odem, oder lebendige Seele? freylich! was ist's dann sonderbahres, daß der Mensch empfangen hat einen lebendigen Odem, einen Geist des Lebens? ohne Zweifel wird dadurch mehr angedeutet, als das natürliche Leben: & p. 273. Die Seele ist des Leibes Leben. p. 276. Man sagt die Natur bearbeite den Leib in Mutterleib? ist nicht übel geredet, dann da liegt in Mutterleib kein lebloser Klumpe, wann ein Kind gezeuget wird, sondern es ist dabey ein lebendiges Wesen, eine menschliche Seele, von welcher die Frucht in Mutterleib ihr Bewegnuß, Zunehmen und Wachsthum empfähet: *conci- liamus in hac meditatione B. Buddeum in Institut. Theolog. Dogmat. Lib. II. cap. 2. §. XVI. p. 371. seq. Ubi observandum vocem נפש subinde de respiratione, halitu, flatu, adflatu usurpari: sæpius tamen cum de homine adhibetur, animam ejus rationalem denotat: conf. Prov. XX. 27. Certe hoc loco aliquid distinctum a corpore, ea voce significari, res ipsa docet. Non enim ut de brutorum, ita & de hominis Creatione Moses loquitur, ut animæ corporisque creationem conjungat; sed primo de corporis, tum de animæ productione verba facit, ut significet plane diversum quid a*

C
Corpo-



Corpore esse animam. Præterea cum DEUS ipse hanc animam vitarum in naves hominis, inspirasse dicatur, non potest utique materiale quid intelligi: Cum enim Deus Spiritus sit, inspiratio quædam materialis de eo cogitari nequit: pergit porro p.372. Quando autem DEUS homini inspirasse dicitur נשמת הים animam vitarum, voce הים in multitudinis numero posita, indicatur, non vegetativam tantum ac sensitivam vitam in homine esse, ut in brutis atque plantis, sed aliam adhuc, scilicet rationalem: Haud obscure ergo divinus scriptor docet, unam quidem in homine esse animam, sed eam diversis potentiis, s. facultatibus esse instructam: porro ait: Atque ita non tantum originem, sed naturam simul indolemque animæ Moses nos condocet: Intelligere namque ex ejus verbis licet, 1) non plures, sed unam animam habere hominem, quæ tamen potentiis seu facultatibus variis sit instructa 2) eam non ex essentia divina genitam, sed per inspirationem ex nihilo productam, 3) adeoque nec ex materia quadam creatam, hinc & materiæ expertem, simulque & immortalem esse.

§. V.

Quamvis quidem hujus asserti varia testimonia, tam ex S. S. petita, quam ex probatissimis Theologis collecta in disp. de Natura Morborum Medicatrice §. 4. & 5. D. D. Præses protulerit, tamen præter illa adhuc hac occasione multa alia in medium proferre lubet: quam ob rem in continuatione hujus instituti parallelum quasi locum Ezechielis XXXVII. 7-10. commendamus: Prophetavi itaque sicut præceptum erat mihi: factus autem est sonus dum prophetavi & ecce terræ motus: accesserunt ergo ossa, os ad os suum: vidique cum, ecce, super illis nervi & caro adscendit,

dit, & obducta est, super illa cutis superius; Spiritus tamen non erat in illis: tum dixit ad me, propheta super spiritu; propheta fili hominis & dic ad ventum; sic dixit ADONAI JEHOVAH, a quatuor ventis veni spiritus, & inspira in occisos hos ut vivant: quum ergo prophetavi sicut præcepit mihi: venit in eos spiritus & revixerunt (NB. hic connectitur Spiritus & vita naturalis) steteruntque super pedibus suis &c. de hoc Spiritu ita commentatur Tossanus in h. l. v. 5. Althem. Den Geist, d. i. die Seele in einen jeglichen Leib. & v. 9. Der Geist, welcher das Leben ist der Menschen, so lange er in demselben ist, es wird das Wörtlein Wind für Geist genommen; nicht daß der Wind den Tode das Leben oder die Seele könnte geben oder einblasen; sondern daß es Gott beliebe den Wind zugebrauchen, zu einem Vorboten seiner kräftigen Wirkung, wegen der Gleichheit, die etlicher massen sich befindet, zwischen den Wirkungen Gottes und der Kraft des Windes, und zwischen den Blässen des Windes und den Althem, welchen die Seele in den lebendigen herfür bringet: Calovius in Bibl. V. & N. T. illustratis in locum Gen. II. v. 7. p. 234. ita differit: neque vero spiraculum vitæ est Spiritus S. uti vult Philastrius in Catal. hæret. c. 99. sed ipsa anima rationalis, quia in homine simul est vegetativa & sensitiva, ex qua oritur respiratio & exspiratio, unde ψυχὴ a ψυχάζω frigus capto, רֵיחַ a רָחַץ respiravit dicta: porro dicit: Spiraculum Vitarum, ut significetur gemina hominis vita, temporalis & æterna, mox subjungit: annon ad animæ, quatenus est εὐνοία ἕκαστου hominis, perfectionem pertinebat, ut actuaret & informaret ipsa corpus suum? ad quod natura habet propensionem, adeo ut dissolutio ei naturalis non sit: præterea idem Theologus in verba: & factus est homo in animam viventem ita p.

235. commentatur: *non per transmutationem, sed communicationem, quia spiraculum vitæ, corpori, e limo terræ formato, inditum, ad unionem & communicationem, ita ut corpus & anima unum constituerent suppositum, unam personam & corpori anima vitam, motum & sensum communicavit, eumque quia anima rationalis, fuit, vitam intellectualem vivere fecit: Jacob. II. 26. dicit: corpus sine Spiritu mortuum est: Vener. Dn. D. Langius in hunc locum im Apostol. Liebrund Recht inter alia ita commentatur: Die Seele erhält den Leib in seinen Wesen und Leben: item ein Leib der ohne Seele ist, beweget und reget sich nicht, wircket nicht das aerinaste und wird billig vor todt gehalten: conf. Ejusd. Entwurff der falschen Philosophie in System. Wolff. Sect. II. thes. 7. 8. 9. Loveniensis Prof. Fromondus in Eph. 5. v. 14. ex Chrysostomo profitetur: si anima, quæ est energia corporis, abscedit, corpus moritur: hinc etiam in ebraica Lingua vox animæ non modo spiritui immateriali hominis, sed etiam corpori Vivo tribuitur: quare B. Lutherus in Genes. XV. dicit: Man muß in der Schrift gewohnen des Wortes Seele, daß es nicht allein den Geist, der da von den Leibe scheidet, wie wir es in unsrer Sprache führen, sondern den lebendigen Leib, lebendige Leute heisset; das ist die Weise auf Ebräisch zu reden. p. m. 109. 110. inde liquet, quam arcte anima & vita connectantur: producimus insuper iteratum Buddei testimonium, quando in Histor. Eccles. V. T. Period. I. Sect. I. §. XI. p. 91. profitetur: Dum Moses plurali numero *¶* *vitæ* dixit, indicare voluit, unam eandemque in homine esse animam, cujus diversæ sint facultates & operationes: unde refelluntur hoc ipso, qui plures una in homine statuunt animas, simul & qui animam materialem statuunt: ita etiam plurimi commentatores Spiritum, cujus Ezechiel mentionem*

tionem injicit l. all. pro *anima rivificante* interpretantur; vid. *Biblia Vinariensia & Tubingensia*: Hisce testimoniis satis perspicuis nunc alia annectimus ex probatissimis Theologis collecta & selecta: *Ambrosius Lib. I. de dignit. condit. human. cap. 2.* ait: *anima in suo corpore ubique tota viget, vivificans illud, movens & gubernans*: porro *B. Arndtius in Postilla Evangelica Festo Annunc. Mariæ Conc. III. p. 359.* docet: Die Seele theilet dem Leibe das Leben mit, und bleibt dennoch von Leibe unterschieden, aber nicht getrennet: *distincta, non divisa.* *Heinr. Müller in himl. Liebes Ruff P. I c. 1.* loquitur: Es ist ohnmöglich daß der Leib lebe ohne die Seele. *Gejerus in Allgegenwart Gottes 43. Andacht p. 470.* confitetur: Unser Leib hat ohne die Seele kein Leben. *p. 471.* Gott giebt allen das Wesen und die Bewegung, wie die Seele dem Leib: *incomparabilis & consummatissimus ille Theologus B. Spenerus dicit in der Lauterkeit des Evangel. Christenthums Part. II. Festo Laurentii p. 417. b.* Das Leben kommt von der Seele her: *in Concion. Catechet. Conc. 41. p. 294.* Ohne Seele ist der Leib todt: *in Buß Predigten Pars II. p. 392.* Wie der Leib von der Seele das Leben wahrhaftig empfängt, daß nicht nur die Seele, ob sie wohl der einzige Sitz und Quelle des Lebens ist, sondern aus der Seele der Leib auch thätlich lebet: & *p. 448* Die Seele ist der Ursprung aller seiner menschlichen und natürlichen Würckungen: *in Lebens-Pflichten p. 414. n. 4.* Die Seele muß den ganzen Leib regieren. & *p. 500.* Das Leben des Leibes kommt von der Seele. Ex *Philosophis antiquissimis* allegamus *Aristotelis* definitionem *animæ* & sane a *principaliori* operatione *rationalis* dictæ, *Lib. II. de anima c. 2. text. 24.* quod sit id, quo primo *VIVIMUS*, sentimus & intelligimus; quod vero *primum*, aut *primo* vivere dicitur, nihil aliud, quam *vita naturalis*, aut *comparate vita corporis* existit:

e recentioribus *Sturmius in Physic. Conciliat.* sub multa fluctuatione, incertitudine & hæsitatione *Part. Specialiss. Sect. Post. cap. 1. §. 8.* confitetur: *si vel argumento, vel experimento evidenti constiterit, animam hominis rationalem posse & solere præstare non proprias solum, sed animæ sentientis, ac nutrientis vices, h.e. præesse coctioni in ventriculo, generationi in utero, loco motioni in artubus, non patiemur certe frustra multiplicari animarum in uno corpore numerum: vid. Fabri tr. de homin. Lib. 7. propos. 4.* & licet *Sturmius* dein in aliam abeat sententiam, tamen ut postulavit *argumentis & experimentis* abunde demonstrari potest, quod *anima rationalis Natura* s. *principium vitale* existat.

§. VI.

Hæc veritas, sicut *revelationi divinæ & sanæ rationi* admodum conformis, multisque *testimoniis* roborata est, ita minime *obscura*, abscondita, allegorica, metaphysica & ex *præconceptionis* opinionibus formata, sed *simplex*, evidens, sincera, naturalis & *perspicua*, minus fucata aut larvata, neque falsis suppositionibus superstructa, frivole excogitata, aut sciolis figmentis, æquivocis experimentis & metaphoricis commentis colorata, quin potius *Gloriæ DEI*, statui *naturali & genuinæ* hominis conditioni *magis adæquata* existit: si enim non *obscura* adsertio est, quod *voluntariis* motibus anima multa sui corporis membra instruat; quod eadem nec *volens*, nec *sciens* sub *Patheticis* suis commotionibus *omnes* sui corporis partes *fluidas* æque ac *solidas* pariter moveat, quod sub *peculiaribus* applicatione & *exercitatione* plane *singulares* motus in & cum corpore perficere & administrare *discat* soleatque, quos

quos *non omnia* individua, *tali* exercitatione *haud* qualificata, producere & præstare possunt, quod per *imaginationem* nec *sciens*, nec *volens* interdum *mirificos* in & cum corpore suo edat effectus; quod peculiaribus *moribus* & *activioribus*, *impetuosioribus*, *pertinacioribus* & *intensioribus* nec *sciens*, nec *volens* multos motus in *corporis œconomia* alterare & *immutare* soleat; quod *continentia* & *tranquillitate*, imo *reliqua generica vigorosa* activitate *omnes* functiones, ad *processum vitæ* spectantes, allevare, excitare, promovere, accelerare & ordinare soleat; quod *vicissim immoderata* sua *morali* qualitate, aut *languore*, *morositate*, *pervicacia* & *impatientia* omnes *tales* functiones pervertere, turbare, impedire soleat, (*vid. D. D. Præsidis dispp. de Morum & Morborum consensu, de mente sana in corpore sano, de valetudinariis imaginariis, de therapia imaginaria, de phantasiæ usu, lusu & abusu in medicina*) ita nullo moroso, *præjudicioso* ac repugnante animo reliquum *jus ejusdem animæ* in *œconomiam vitalem* denigrari, aut pro *obscuris* & *metaphysico* adserto declamari & declarari debet, ni *iniquo* ac malevolo tali *judicio* *honor ordinis divini* violari debeat; siquidem sapientissimus Creator ex *Anima* & *Corpore* formavit hominem, corpus cum illo Spiritu, quem inspiravit, *rationali*, etiam *naturaliter vivum* reddidit, hocque prædicatum omnium primo *non corpori*, sed *animæ rationali* tribuit: quicunque itaque hanc veritatem, quod *anima rationalis* hominis *natura* sit, audacter & austere *abnegant*, illi omnes prædictas *infallibiles* ac luculentissimas veritates impugnant, insuper ex studio contradicendi contra lucem & solem loquuntur: quicunque enim *æqui pollentes* propositiones

sitiones pro arbitrio nunc *negant*, nunc *affirmant*, illi aut valde *incerti*, *dubii*, *instabiles*, aut animo *partibus* infecto prædicti & *sibi* tantum *placentes* deprehenduntur : Si enim *tale principium* pro *Natura* humana declaramus ac *agnoscimus*, quod *ipse Creator* eo destinavit, formavit, confirmavit, ac *necessariis* viribus & qualitatibus instruxit, *sine quo* corpus, *feri*, *vivere*, actuari & *integritatem* obtinere & servare haud potest, quod principium omnibus *reliquis dogmatibus sacris* convenit, a *probatissimis Theologis* confirmatur & approbatur, *sanæ rationi* apprime conforme est, innumeris *sensualibus* effectibus corpus afficit, *ordini naturæ* magis congruit, *nexui animæ* cum corpore exacte respondet, omnia *phænomena* curatius illustrat, effectus ac mutationes, juxta *alias* sententias vel plane *irresolubiles* & indemonstrabiles, vel *frivole* & *ridicule* explicabiles (*vid. D. D. Præsidis Progr. de Natura quatenus idolo & asylo ignorantiae in Medicina*) magis *solide*, *judiciose* & *perspicue* interpretatur & explicat, omnibusque requisitis, *plus quam ulla alia*, opinio satisfacit, in *omni* vero demonstratione *naturali* connexione, ordine & conclusione, citra aliquam *larvam assimilationum & suppositionum*, nititur, tunc aliud *ignobilius*, *vilius*, *inferius*, *indigniusque*, quod omnibus hisce desideratis *nullo modo* satisfacere potest, *supponi*, obtrudi & *præferri* haud debet: hæ singulæ itaque qualitates militant pro *anima rationali*, quæ eapropter in suo corpore & *mentaliter* & *naturaliter*, *spiritualiter* & *physice* operatur, hacque facultate a Summo Creatore instructa est: nec tamen eapropter existimandum, quasi *metaphysica* hæc sit adsertio, quo minus actio & operatio animæ in suo corpore non *abstracta* aut *metaphysica*, sed

sed *physica & naturalis*, distincta & manifesta est, quominus *voluntaria* corporis commotio, aut *commercium animæ cum corpore* sub *animi pathematibus*, juxta *mores*, per *imaginationem*, per *hæreditatem*, mediante *sensibilitate personali*, æque minus æquo & sobrio *judicio metaphysicis* aut *tenebrosos respectibus & subtilitatibus* accenseri potest & debet.

§. VII.

Sicut ex hætenus dictis *generali* adhuc & velut *introductoria* explicatione facile *veritas* illa, quod *anima hominis rationalis Natura humana* s. *principium vitale* sit, inclarescit & ab illis agnoscitur, qui *rationes* admittunt, scrutantur, conciliant & applicant, nec studio præter necessitatem contradicendi ac vituperandi aut philantia turgent & æstuant, ita *multa argumenta ac demonstrationum* specimina suppetunt atque supersunt, quibus eadem confirmari & certificari potest: Horum argumentorum *quædam* in medium proferre lubet & *primo* quidem loco *taliam*, quæ ex *Ratione* hanc sententiam probant: Summum Creatorem itaque corpus, non dum *vita naturali* præditum, creasse, *Sacra Scriptura* testatur: Benignissimum ac Omnipotentem Deum corpori *inanimato* & *vita destituto*, cum *inspiratione animæ vitam* etiam *naturalem* suppeditasse, perinde *S. Codex* confirmat; inde fluit, hanc vitam corpori non fuisse propriam, sed adventitiam & ab eadem anima provenisse; nam asserere vitam illam ab anima & corpore distinctam & tantum sub connubio animæ corpori insinuatam fuisse, nuda opinio, nulla ratione solida instructa est; inde enim perversa illa opinio fluere, quod vita *spiritualis* etiam utpote distinctum & separatum quid ab anima confi-

derari & haberi debeat; qualis opinio multarum *confusio-*
num mater esset; hinc anima hominis non esset *spiritus*,
 Spiraculum aut *causa vitarum*, sed tantum *signum*, index
 & comes *vitarum*: *Hæc anima* vero a Creatore *illa quali-*
zate instructa est, qua *operari*, movere & activam se exhi-
 bere queat; *actio* vero illius est juxta ordinationem & *in-*
augurationem divinam vitas illas & *Spiritualem* & *natura-*
lem administrare, *illam*, qua eadem anima proximum *com-*
mercium cum *Deo* & *æterna* beatitudine habet, *hanc*, qua
 cum suo domicilio, *in quod* Deus eandem inspiravit, co-
 hære ac in & cum illo *temporali* felicitate frui possit: de
 corpore *nec* per *revelationem*, *nec* per *rationem* constat,
 quod *Deus* ipsi *facultatem movendi* largitus sit; id quod
 tantum *fallaci suppositione* traditur, quasi Deus *materiam*
activam, aut *per se* moventem creaverit, quod vicissim de
anima, utpote *spiritu* ac *digniori* subjecto meliori & *æ-*
quiori jure ac ratione prædicari & demonstrari potest;
 præprimis dum præter facultatem movendi, nullam aliam
principalem habilitatem anima possidet; inde liquet, quod
 juxta ordinem, destinationem, leges & *voluntatem Dei*,
 utpote *veram* & non fictitiam, laceram, imaginariam, præ-
 judiciosam & confusam *Harmoniam præstabilitam*, anima
suum & non *alterius* subjecti corpus *vivificare* debeat, at-
 que hoc privilegio & potestate instructa sit: Si itaque ho-
 sce respectus *connectimus*, indeque sanam & *naturalem*
 conclusionem formamus, ita judicamus: Si *Deus* in for-
 matione *hominis animam* & *corpus* creavit, illam *activam*,
 hoc actuatione, motu ac *vita indigum*, attamen destitu-
 tum, quidni *majori* jure evincere & concludere queamus
 debeamusque, *animam suum corpus illa* qualitate instrue-
 re,

re, quam illa possidet, corpus vero eadem indiget, & quam hoc nec sibi ipsi largiri potest, nec Deus eidem concessit, indidit, ac propriam fecit: & si processus vitæ dignior est respectus, quam æstimatio nudi corporis, quod vita carens, nullis ordinariis usibus humanis inservit & ita sobria magis mente majorique iterum jure, operatio & directio vitæ a causa digniori, velut anima, ac indigniori, utpote corpore, derivatur & demonstratur: Et quemadmodum Deus, dum juxta suam omnipotentiam corpus per se vivum, formare potuisset, id ipsum tamen haud fecit, sed cum anima huic corpori vitam tribuit, ita quoad operationem aut activam emanationem vita non provenit a corpore, sed ab anima corpori suppeditatur, præcipue dum anima in processu motus voluntarii, quem in & cum corpore perficit, principalissimo illo motu, videlicet fibrarum motricium constrictione & relaxatione, qui in œconomia vitali palmarius etiam motus existit, utitur, ita facile elucescit, quod juxta valorem hujus rationis Anima Rationalis Natura humana esse possit, imo jure strictiori esse debeat, quam ulla alia supposita causa esse forte possit; nam facultas hæc evidentiori judicio & demonstratione, ut & eminentiori sensu de anima, quam aliunde deduci, derivari & prædicari potest.

§. VIII.

Et quid magis pro jure animæ in suum domicilium, videlicet corpus militat, quam illud vinculum atque commercium, quod inter utrumque subjectum, juxta ordinem & legem Dei, intercedit: etenim in hoc mundano systemate Anima Rationalis sine corpore humano existere & operari haud debuit, quamvis per omnipotentiam Dei, si videlicet

Deo *aliter* placuisset, in hac naturali rerum universitate *ita* existere & operari *potuisset*, sicut de *angelis bonis & malis* id deprehendimus: quare sapientissimus Creator, *primo* loco formavit corpus, & *intra hoc* introduxit animam, *ita mediante illo* hæc anima cum subjectis, effectibus & phænomenis *physicis* commercium inire potuit, & vicissim *hoc corpus* ab *illa* anima principalem hanc qualitatem impetravit, videlicet *integritatem*, conservationem & congruam actuationem *motus*, usibus *humanis* quadrantem: utitur itaque *anima* suo corpore, utpote *organo*, cum quo *generice* objecta *materialia & motus* in & cum materiis procedentes percipit & *observat*, ut post hanc animadversionem, *de iisdem* æstimationem ac *judicium* formare possit; cum *organis* enim *Sensoriis* illa partim hæc *objecta*, partim horum *relationes & effectus physicos* percipit & advertit, cum *corpore illa* ipsa sese quantum possibile est *talibus* objectis horumque effectibus *appropinquat* aut *subducit*, id quod in *ordine naturali sine corpore* præstare *haud* potest; hac ipsa vero operatione non modo *interiores* suas sensationes, sive *mentis* operationes, *excolere*, exercere & *excitatiores* ac agiliores, sed & in *judicando*, æstimando, comparando & *applicando* promptiorem & perfectiorem se reddere solet; quam ob rem *anima* in proprium sui *principalioris* officii commodum corpore utitur: quam *vile* vero & *anile*, abjectum & ignominiosum in dignitatem *animæ*, utpote *Spiritus*, ejusque *Creatoris* esset *judicium*, quod anima quidem directe, positive & proxime in *rationalium* suarum operationum emolumentum corporis commercio indigeat, corpus vero in *ignobiliori* videlicet *vitali* & per *organa materialia* perficiendo

ciendo, processu, non modo *animæ directo* commercio non utatur, sed & si illud ex *accidenti*, velut in *animi pathematibus*, evenerit, ab eodem *turbetur* & *pervertatur*: quis non ex hoc concluso perspiciat, quam *inique* quidam *partes* contra *animæ dignitatem*, a Deo institutam, teneant, indeque magis *corporis servi*, subditi ac mancipia, quam *animati* sint homines, qui magis gestiunt a causa *viliori*, utpote *avtomata* & *ignobilia artefacta*, videlicet a *corpore* hujusque affectionibus, quam ab *illo Spiritu* dirigi, quem summus *Creator corpori otioso* sic dicto, adhuc *anima* & *motu destituto*, inspiravit, indeque effecit, ut *Homo creatus* sit; siquidem exinde elucescit, quod *principalior* character *humanitatis*, aut quod *homo* factus sit, non ex sapientissime formata *machina* corporis, sed ex *Anima illa* inspirata, duci & derivari debeat, juxta testimonium *Sacri Codicis*, quod Deus *perfectionem* creationis hominis absolverit hac *inspiratione* animæ in corpus: quo *dignius subjectum* est Anima, eo *digniora prædicata* ab *illa* & non a *corpore* deduci debent: hinc Deus *vinculum animæ* cum *corpore* ita *univit* & confirmavit, ut, quamvis *post mortem* naturalem corpus corruptionem & *destructionem* præsentis naturalis *infirmæ* & *imperfectæ* structuræ subire debeat, tamen *denuo cum anima uniatur* & in *æternitates* unita permaneat: præterea *corpus sine anima* nec *feri*, nec *subsistere* diu, nec *usibus congruis* destinari & applicari potest: enim vero in *perfectissimo* suo statu mox *post sui formationem* corpus *sine anima*, nuda fuit *otiosa machina*, omni functione & actione expers, & anima, utpote causa *vitæ* naturalis *indigens*, ut aliquoties monuimus; si itaque singuli motus *vitales* & *naturales* *sine ani-*

D 3
ma,

ma, adeoque a corpore, ope suarum qualitatum *mechanicarum*, perfici potuissent, sane id ipsum fieri & observari debuerit, in *illo statu*, quo *perfectissimis* qualitatibus corpus instructum fuit, nunc vero hoc ipsum in *illo statu non* contigit, ergo vi hujus *commerci corporis cum anima* vita *naturalis*, sine *anima* fieri, existere & a corpore supponi *non* potest; per *justam* propterea consequentiam eadem *anima* principium vitale, sive *natura humana* existit: sine anima itaque corpus est *mortuum*: de quo posteriori phænomeno male interpretatio ita formatur: quod vita quidem *non* ab *anima*, sed a *propria* actione *corporis* proveniat, interim quia Deus animam & corpus *conjunxit*, fieri, ut si anima a corpore suo *separatur*, corpus simul, quia nunc *ulterioribus* usibus *humanis* haud inservit, *motus* suos amittere & juxta voluntatem divinam deferere teneatur, quæ adsertio vero valde *obscura* & *plusquam metaphysica* est.

§. IX.

Quod *corporis* rationem attinet, tunc illud a *Creatore instrumentali* aptitudine, i. e. *mechanica* dispositione qualificatum est, ita quidem, ut *singulæ* illius partes *congruis* motibus, ad *salutarem* finem impetrandum idoneis, instrui queant: neque tamen propterea hi *motus* cum illis partibus *confundi* debent, ac si hisce *proprii* sint, & ab iisdem *primario* proveniant, aut sub *ficto* influxu alicujus liquidi *materialis* subtilissimi in & cum iisdem perficiantur, siquidem hi motus illis partibus *adventitii* sunt, quare in hisce peculiari *modificatione* & *directione* indigent, quoniam *mechanica* fabrica illarum ita constituta est, ut *variantes* motuum *gradus*, atque processus in & cum illis institui queant,

ex quibus aliqui vitæ & sanitati *congrui*, quidam vicissim *ad-*
versi & *perversi* esse possunt; haud enim *universalis mecha-*
nica qualitas est, ut machinæ quædam *ita & non aliter* move-
ri debeant, queant, soleant, quæ potius qualitas *specialis* ali-
 quando plane *accidentalis* est, dum a *corporibus abesse* potest:
 hinc quædam machinæ ita sunt *conformatae & constructæ*,
 ut juxta suam dispositionem *aliunde absolute moveri, dirigi*
 & ad certos *effectus & fines proportionate* applicari debe-
 ant, omnes vero sub *aliquo directorio* consistant: ob id
 tam *rigorose* concludere & judicare haud licet, quod cor-
 pus humanum, eo, quod *machina* est, se ipsum motibus
 afficere & *dirigere* debeat: quare *creberrimis* exemplis
 constat, quam *facile* ac sæpe motus illi, qui *mechanici* in
 corpore humano dicuntur, per multiplices *naturales* cau-
 sas *mutari & perverti* queant, unde tot turbulenti, vitio-
 si, *erronei* & alieni motus oriuntur: Si itaque partes cor-
 poris *variantibus* & æque *facile inversis*, quam *congruis*
 motibus affici possunt & solent, attamen in processu *vitæ*
 & *sanitatis* naturalis *regulariter* & legitime actuantur, se-
 quitur, quod posterior respectus non nitatur *necessitate*
mechanica, sed rectius ab *alio directorio* proveniat, unde
 multarum *aliarum machinarum* motus ac usus dependent;
 hinc *instrumentum* non definitur, quod sit subjectum,
 certa dispositione materiali, idoneis, *usibus & finibus* qua-
 drante, præditum, *se ipsum actuans & dirigens*, sed a
 causa *altiori & digniori* directum: huc quadrat dictum
Esaie X. 15. num gloriatur securis contra findentem per
eam? num extollit se serra contra moventem illam? nec
 quidem attendenda nobis videtur exclamatio, si *demon-*
strationis loco profertur, quod Deus *potuisset* machinam
 corpo-

corporis ita informare ac disponere, ut *se ipsum moveat & dirigat*, sicut artifex homo, ut quidam aiunt, tales machinas construere potest! imo minus *adæquata & iusta* nobis videtur esse *subsumptio & connexio*, quod, quia machina corporis humani multis modis machinas, manu & arte humana paratas, superat, ergo Deum etiam *voluisse* ut *suum* opus, *sapientissime* formatum, *se ipsum* actuet & dirigat: quippe quæ *consequentia* aperte *vitiosa* existit, cum nulla *necessitas* illam inferat, nisi *præconcepta* opinio, quod corpus humanum, quia *mechanicis* qualitatibus præditum est, & quia anima rationalis illud afficere & regere non debeat, *se* propterea *ipsum movere* teneatur: ex præmissis enim meditationibus & demonstrationibus concludimus, si anima rationalis secundum *voluntatem* suam varias corporis partes, eadem dispositione physico-mechanica præditas, non modo *movere*, sed pro arbitrio *diversimode* movere potest, citra absolutam *necessitatem automaticæ* actionis in corpore, quid obstat, cur eadem *reliquas* corporis sui partes juxta leges, *ordines* & regulas œconomiae *vitalis* etiam *citra* influxum *positivæ* voluntatis, *ita* motibus afficere & dirigere queat, ut nulla coacta *necessitas* materialis, aut *mechanica* directorium gerere teneatur: quemadmodum æque vitiosa & *erronea* esset comparatio, connexio & *conclusio*, quod, sicut artifices avtomata, aut machinas extruxerunt & conformarunt, quæ *ferme similes* actiones præstiterunt, ac *humanæ voluntariæ* existunt, (*vid. A. N. C. Dec. 1. an. 10. obs. 1. de Statua humana se ipsam movente, s. homine Cartesiano*) ita genuinæ actiones sic dictæ *voluntariæ*, non *arbitrii imperio* indigent, sed etiam *non volentibus* hominibus in *ordinario & consueto* statu succedere possent;

possent; quod *posterius* vero, videlicet *consequentia* simili nœvo ac errore laborat: nobis vicessim ex hisce præmissis videtur *sanæ rationi* & præcipue *ordini divino* magis conforme esse, si ita judicamus, quod hæc œconomia *naturalis* in corpore, tam *affabre* formato & partibus multiplicibus, diversa *dispositione mechanica* instructis, a causa *rationali* instituat, *administretur* & *dirigatur*, ita, ut in *ipsius corporis* utilitatem singularumque harum *partium* emolumentum per illam *mechanicam* dispositionem *salubres* ac *durationi* ejusdem, extreme *fragilis* & corruptibilis, corporis quadrantes effectus, sub multiplici *vicissitudine* causarum *aliorumque* effectuum *naturalium* & *moralium*, obtineantur: quemadmodum itaque facilior, solidior & luculentior demonstratio est, quod corpus tam *mirabiliter* constructum & ad *diversos* motuum gradus assumendos pronum, a causa *rationali* dirigatur, quam a causa omnibus modis *obscura*, *fictitia*, *supposita* & per mirabiles respectuum rationalium contorsiones & confusiones colorata; siquidem hætenus multiplices tales paralogismos commemoravimus.

§. X.

Rationibus & demonstrationibus hætenus prolatis, quæ thesin nostram confirmant, addimus porro hanc, quod ipse *Motus*, mediante quo *corpus* affici ac dirigi, *vita* produci & *Natura* suo officio fungi debeat, non a *corpore* hujusque affectionibus, neque ab *extranea* quadam communicatione provenire queat, proptereaque ab *alia* & quidem *digniori* causa *primam* suam originem sive emigrationem ducere debeat: nam si *Motus indolem* indagamus, haud ulla *solida* ratione probare possumus, quod ipse

E

corpo-

corporeæ sit essentia, id quod *Dn. D. Præses* in sua *Physiologia & Physica* uberrimis rationibus confirmavit: motus enim in *quocunque* subiecto inveniatur, est *actio* aut operatio, hæc porro nullibi est *materia* & si *materialis essentia* non est, non potest esse *vis*, aut *qualitas materiae propria*, sed *accessoria*: nam asserere velle Deum materiae *indidisse*, aut *concreasse motum*, materiam per voluntatem Dei esse *activam* & per se motus *primam* causam, thesis tantum est, quæ hætenus nondum & nullibi demonstrata, confirmata, applicata, nec contra rationes *oppositas*, vindicata est: ergo *ubicunque* motus est, ibi *actus* est; *actus* vero nullibi materia, aut *essentialiter corporeus* est, per consequens nullibi motus erit *materialis*: ob id *spiritualis* essentia, attamen non ipse Spiritus existit; æque ac *intellectus* & *voluntas* sunt *actus animæ* & propterea *nihil materiale*, sed spirituale, tamen *non ipsa anima*: discrepant itaque, ut *causa* & *effectus*: si itaque corpus *vivum* & *sanum* reddi debet, debet utique certis motuum *speciebus* & *gradibus* affici; si vero motus nec *materialis*, nec *propria* materiae affectio, sed *spiritualis* est, tunc ipse *principaliter* a *tali* causa provenire debet, quæ *eiusdem* essentia existit, nimirum incorporeæ aut *immaterialis*; si porro in homine *præter* animam rationalem *nulla alia spiritualis* & *immaterialis* existit causa, quam eadem *anima rationalis*, ita per *naturalem* consequentiam motuum, quibus vita & sanitas administratur, *nulla alia* causa *efficiens prima, propria*, genuina, idonea, congrua & proxima esse potest, quam *eadem* anima; de hac porro scimus, quod unica & *genuina* ejus facultas sit, capacitas movendi, operandi, agendi, quod porro a Deo *corpori indita* sit, quod
ante

ante ejus inspirationem intra corpus, hoc otiosum & motu destitutum, vitæque expers fuerit, quod ipsa propter corpus & corpus propter ipsam sit, quod sine anima corpus mortuum sit, quod anima multas corporis partes proportionate movere queat soleatque, quod tamen corpus motu indigeat, si vivum & sanum esse debet &c. quis itaque sub hisce respectibus adeo contumax & morosa repugnantia austerus sit, ut hoc non obstante asserat animam non naturam esse, sed aliam incertam, dubiam, fictam, suppositam, imaginariam & nudis similitudinibus, ac allegoriis coloratam causam, naturam esse, de qua singula hæc prædicata nulla evidentia, confidentia, certitudine & solida perspicuitate enunciari possunt: Hi motus itaque ab intra corpori communicantur, æque ac voluntarii, qui non extrinsecus ad proximum usum adspirant; quare Aristoteles naturam definivit, quod sit principium motus & quietis, in illo subjecto existens, in quo inesse deprehenditur motus primo, per se & non per accidens: sicut itaque anima motus voluntarios ab intra communicat & in partes immittit, ita perinde reliqui motus ad aliarum partium actuationem spectantes, non ex aëre deduci, nec ex victu & potu supponi debent, sed magis fundata ac perspicua ratione ab interna illa causa demonstrari possunt, quæ cum iisdem proximiorum communionem habet: & quemadmodum motus, qui sub animi pathematibus, aut ob immoderatiores mores, imaginationem, hæreditatem, consuetudines cerebro, generi nervoso, cordi, ventriculo, hepati, renibus, intestinis, locis genitalibus, &c. communicati, non ex aëre, victu & potu deduci possunt & debent, sed proxime & rectius ab anima demonstrantur, ita pervicax

esset morositas ac præjudicium, si in *ordinaria* œconomiae vitalis administratione, motus *aliunde*, quam ab eadem anima deducerentur; unde non nisi crassa emergeret *confusio*, qua supponitur; quod (juxta illorum *arbitrium*, qui animam pro natura non agnoscunt & admittunt) nunc *quosdam* motus in corpore eadem anima perficeret, aliquando *tales* motus *alia* causa exequeretur, interdum anima motus in suo corpore *voluntarie* exerceret, quandoque *involuntarie* administraret: quare videtur hic adesse favor in judice, qui pro *lubitu*, nunc animæ jus *in corpus* admittit, nunc denegat: interim pro ulteriori nostræ sententiæ confirmatione judicamus & indicamus, quod motus *ab extra* corpori immissus, sive ab aëre proveniat, sive ex alimentis & potulentis derivetur, *ineptissimus* existat, quo *quaslibet* corporis humani partes ita congrue & *proportionate* actuaret & disponderet, ut sub multiplici concurrentium causarum *moralium* & *physicarum* vicissitudine, tamen effectus, *conservationi* ejusdem corporis *exacte* respondentes inde eveniant: hinc connectio motuum per hanc corporis *machinam* dispositorum cum *diversis* causis, *in* & *extrinsecus* obtingentibus, longe *abstrusior*, infirmior, obscurior & imperfectior est, quam hæc, si judicamus, *corpus* debet *moveri* & quidem *convenienti* motus *gradu*, ad illum *finem*, qui est *conservatio* ejusdem corporis; *motus* est subjectum *incorporeum*, cum *corpore* vero facile & cito *commercium* subit; *anima rationalis* est in corpore, quæ *nihil aliud* potest, quam *movere*, siquidem *motus* & *anima* utpote *causa* & *effectus* magis *conveniunt*, quam *motus* & *corpus*; anima non modo *potest*, sed etiam *solet* in variis *aliis* casibus corpus suum

moti-

motibus afficere & regere, ergo longe convenientius in celebri processu vitæ naturalis anima, quam alia causa hoc suum corpus iisdem motibus instruit.

§. XI.

Et ne fontica *dubitatio* hanc veritatem premat, *quæstio* movenda erit, an *anima*, utpote substantia *incorporea*, simplex, Spiritus & *rationalis*, corpus, utpote subjectum *crassum* movere queat? quod *spiritus* cum *materia* aut corpore *commercium* habere queat, nonnulli *hæsitant*, ob rationem, quia inter *utrumque* deficit *contactus*: at in hoc asserto notandum est, quod ratio *formalis* commercii *æstivi*, non consistat in mutua connexionem aut *contactu* essentiarum, si enim *essentiæ* rerum se tantum contingerent & nulla *alia* qualitas communicaretur, æque otiosum quoddam esset corpus, ac si in lapide *quieto* unum fabulum alterum contingit; hinc ad tale commercium requiritur *communicatio motus*: dum itaque Spiritus *essentia* sua corpus contingere non potest, per *divinam* tamen ordinationem *motus* cum *materia* convenire potest, & in hac universitate rerum etiam *debet*, hinc quia corpus *per se* motum producere & *efficere* non potest, spiritus vicissim per *propriam* & *genuinam* suam potentiam *movere* potest & juxta *divinam* destinationem & institutionem *debet*, ita Spiritus cum corpore non abstractum, sed per *motum*, quem *ipse* efficit, commercium init & subit; nam adfertio quod *Spiritus* eapropter cum corpore convenire *haud* posset, quia ille *immaterialis* & hoc *materiale* existit, nullius *valoris* & *rationalis* consequentiæ est; sicut *Angeli* per potentiam & ordinationem Dei commercium cum materiis habuerunt, sicut *motus* utpote

immaterialis, per potentiam & ordinationem Dei cum *materia* concreditur, ita *anima* cum *corpore* per eandem potentiam & ordinationem Dei commercium habet: sicut *Deus* per *motum* suum *omnipotentem* omnia creavit, & suas creaturas adhuc conservat, sicut *angeli* per *motum* operantur in mundo visibili & diversa *corpora* affecerunt, ita *anima* per *motum* commercium habet cum *suo corpore*: atque ita *anima potest & solet corpus* movere, imo juxta *Dygby de immortalitate animæ cap. 5. 9.* per certam *motus modificationem* corpus movere & *levius* reddere, conf. *Garmannus de mirac. mortuor. lib. 2. tit. 3. §. 25.* quo majori *vigore & alacritate* anima suum corpus *voluntario* etiam motu afficit, eo *levius* in certis casibus illud est; quando vero eadem *anima* suis viribus naturalibus, *torpescit*, languescit & *enervata* observatur, tunc *corpus* evadit *gravius & ponderosius*: exemplo *ægrotorum*, qui quamdiu sub tractatione & *portatione* adhuc *mediocre* corporis pondus habent, nondum juxta *communem* processum ac modum moriuntur, quando vero nunc corpore valde *ponderosi* evadunt, licet aliquando plane *emaciati* sint, tunc *brevi* moriuntur: hinc in omnium facultate est, ut pro arbitrio suo corpus *levius* ac *gravius* reddere queant, per eandem *motus ineffabilem modificationem* & specialissimam exercitationem in suo corpore; quare *spiritus* non modo *subtilissimam* materiam, sed etiam corpus *duorum & trium centenariorum* pondere instructum movere & in notabilem *altitudinem* turris aut montis gestare potest, & solet, quando homines illico adscendunt: quo actu *anima* cujuslibet hominis, *corpus* utpote *domicilium* suum eo defert: Hæc anima rationalis corpus suum

mover,

movet, sine ambagibus aut *intermediis* causis *materialibus*
 juxta *voluntarium* suum arbitrium, quos nominare sole-
 mus *voluntarios motus*, quibus afficit *fibras carneas &*
nerveas, videlicet *musculos, tendines &* cum hisce *ossa*;
 hosce motus *subito* partibus immittit & communicat, pro
 ejus nutu & subito illos iterum pro desiderio suo ac ar-
 bitrio *omittit*; qua occasione iterum haud attendendam
 judicamus illam *oblocutionem* satis jejunam & frigidam,
 quod anima tales motus non *proxime* in *corpus* suum aut
immediate exercere possit, quia spiritus, aut *immateria-*
lis est, sed eo ministerio *liquidi nervei* utatur; quales
extravagationes aut petitiones principii merito vitamus,
 dum reliquam demonstrationem & deductionem, *obscu-*
ram, difficilem, intricatam, confusam & *vanis suppositis*
 accumulata reddunt, atque inextricabilia nova *dubia*
 causantur, quæ primo *nexum animæ* cum ejusmodi *liqui-*
do nerveo & *hujus* cum *reliquo* corpore deinde urgent, in
 qua explicatione si *allegoriæ* separentur, reliqua demon-
 stratio nuda & famelica est; quam ob rem *obscuritatem*
 vitantes, asserimus & inferimus quod anima *repente* tales
 motus, exercere, *augere, minuire, omittere, variare &* cor-
 rigere queat, ut ne quidem per sobriam rationem & *ima-*
ginationem causa intermedia applicari & conciliari queat:
 Si itaque anima rationalis potest *tales partes*, ut ut pro
diversis usibus, *destinationibus &* applicationibus *volun-*
tario movere, cur non *similes* partes & alias ad *alios* usus,
 ad quos voluntas *moralis* necessaria haud est, *motibus* in-
 struere, adeoque *principium vitale* esse possit: siquidem
 connexio & *commercium voluntatis* non pertinet ad re-
 quisita *essentialia* operationis animæ in suo corpore, sed
 potius

potius ad *accidentalia*, quoniam *nonnullæ* commotiones corporis aliquibus *moralibus* usibus, respectibus, destinationibus & æstimationibus inserviunt, aliæ vero *vitalibus* & *corpori* plus inservientibus commodis, effectibus & processibus quadrant: inde etiam est, ut cum *hiscè* motibus nonnunquam *usus* pariter *artificem* faciat: ut ut nonnulli homines *certas* *hujus* motus applicationes, mutationes, directiones & *modificationes* administrare *non* queunt; alii vero talibus *exercitiis* inhærentes *miras* corporis agitationes perficere possunt, testimonio saltatorum, funambulorum, gesticulatorum, morionum &c. & ita in *moralibus*, nec non *corporis* statum concernentibus operationibus animæ *crebra* exercitatio magis magisque *capacem* & *qualificatam* ipsam reddit *animam*: ex quibus omnibus *infirmæ* contradictio elucescit, quasi eapropter *anima natura* esse nequeat, quia *internorum* corporis viscerum motus, non pro *arbitrio* suo suscipere, dirigere & mutare queat; quippe quam oblocutionem, nunc, superius & alibi *satis destructam* conspiciamus: quam ob rem *quælibet* actiones animæ habent *suos limites*, *ordines* atque *leges*, quas ipsa *nec voluntariis*, nec reliquis motibus *transgredi* potest: sicut itaque *directorium voluntatis* in œconomia vitali haud *principaliter necessarium* aut *fructuosum* est, ergo motus *in eadem* juxta suam sphæram, a *Creatore* ordinatam & dispositam, *citra* voluntatem procedunt, aut ab anima, quatenus *Natura* est, administrantur.

§. XII.

Neque tantum *rationalis anima* jus & activitatem in corpus suum prædictis testatur motibus, sed subinde
in

in omnes partes corporis operationem suam transfert, id quod in *Patheticis* animæ commotionibus, sive *affectibus* animi contingit, sub quibus *diversimode partes & officia*, ad *vitalem œconomiam* pertinentia, afficiuntur & mutantur: & si vera esset adsertio, quod anima motus tantum turbare posset (quæ adsertio tamen *veritati* non consona est) illa tamen inde *indubia* veritas elucescit, quod anima etiam *nec sibi conscia* in horum motuum administratione & institutione, nec *volens* ac *deliberans* in eorum exercitio & tamen motum cordis & sanguinis, & quaslibet *se- & excretorias* functiones, quid quod ipsam *nutritionem* valde alteret, ita ut ejusmodi *mutationes* talium *motuum & operationum* confestim cum ipso processu *patheticarum* commotionum *coincidant*, adeoque *connexio* in utrasque satis evidens sit: hinc *obscura & perversa* est interpretatio, quod anima in *genere* motus, in corpore procedentes, *turbet*, inde fieri, ut *ita* turbati motus per se *turbulentos effectus* proferant; dum contra *manifestum* est, quod quælibet *patheticarum* commotionum *species*, *peculiares* causetur alterationes, ut *generica & abstracta* perturbatio & confusio motuum singulis hisce *specialissimis* effectibus satisfacere *haud* posset, dum contra *rationi sanæ* magis *conforme* est, quod *quaslibet* tales *alterationes* ipsa anima perficiat, siquidem *subitaneus* illarum processus, qui mox sub *initio* pathetici motus sæpe contingit, non a *communicatione successiva* motus turbati, sed *proximius* ab ipsa anima, *motum & functionem* talem *directe* alterante, dependeat: quare perinde *phantasiæ* usus & lusus otiosus & lepidus esset, si per ambages adstruere velimus, quasi *anima* sub *patheticis* commotionibus, non *immediate* corpus alteret (cur? quia

F
est

est anima!) sed *ministrante liquido nerveo*; quæ imaginatio in præcedentibus jam rejecta est; quemadmodum *rota* adfertio, quod anima per ejusmodi *ministros* operetur, *falsa*, ridicula, tenebricosa atque obscura, imo innumeris paralogismis, petitionibus principii & contradictionibus turgida & squalida est; *nulla* enim necessitas urget, *subordinatam* aliquam causam supponere aut fingere, dum anima *per se* satisfacit, quo *tales* motus *immediate* proferat & exerceat; alioquin illa *prius* hoc liquidum nerveum *impellere*, deinde plane *dirigere* & quo effectus *patheticis* commotionibus *conformes* fiant, ac proveniant, eo *specialissima* cura & opera disponere deberet, quæ demonstratio deinde nudis *suppositionibus* niteretur, ac in *articulos fidei* fatisceret: Sicut enim in *voluntariis* operationibus nulla tali *intermedia* & ministrante causa indiget, ita frivolum esset *entia* præter necessitatem multiplicare & loco *perspicuæ* demonstrationis, obscuras imaginationes obtrudere velle: si itaque anima sub *patheticis* suis motibus, aut *occasione* illorum, *totum* suum corpus & *singulas* functiones, nec *conscia* nec *volens*, motibus & mutationibus afficere potest, quis jam *solide*, *nervose*, *judiciose* & *prudenter* asseverare & *probare* poterit, quod eadem anima in *œconomia vitali* æque nec conscia nec volens motus & functiones perpetrare neque *possit*, neque *debeat*, siquidem hujus adferti veritatem nec *ordo* & constitutio *divina*, nec etiam illa *sobria* & a crassis præjudiciis libera ratio tuetur & confirmat; hinc potius tam ex hac, quam ex præmissis demonstrationibus *luculenter* & *solide* probamus, animam illam *rationalem naturam humanam* esse: & quamvis *vehementes* affectus animi *convenientem* motum

um

um vitalium gradum ac ordinem valde alterent, adeoque ut plurimum integritatem vitæ & sanitatis violent, tamen quidam horum affectuum non leviter, sed satis eminenter vitæ ac sanitatis processum erigunt, sublevant, excitant & in ordinem ducere adjuvant, testimonio moderati gaudii, accepti ac temperati desiderii, bonæ spei, delectationis ac hilaritatis modicæ, &c. ex quibus facile liquet, quam iniqua & animæ injuriosa sit declaratio, quasi hæc suis affectibus œconomiam corporis tantum turbet, destruat, offendat & pervertat, siquidem vicissim ejusmodi animi pathemata, quæ communi judicio perniciofa prædicantur, in modico gradu existentia, non modo sæpe nihil nocent, sed aliquando plane vim aliquam medicamentosam habent, velut ira, terror, timor, tristitia, *conf. D. D. Præsidis Præfatio diss. de Therapia imaginaria*: Quando vero porro observamus connexionem alteratorum motuum vitalium, sub animi pathematibus occurrentium, cum moralibus illis respectibus, qui in iisdem animi affectibus annotandi sunt, tunc tota hæc demonstratio, quam modo adduximus, eo firmior, solidior & evidentior erit: brevitati in hac posteriori meditatione studentes, allegamus *Illustr. D. D. Stablii Programma sub tit. anomalias motuum vitalium patheticas non esse tumultuarias: disp. de Vita annexum*: inde significamus quod, sicut in iracundia respectus patheticus & moralis est, ut adversum, infensum aut inimicum quoddam objectum possibili vi & potentia, strenue, vigoroſe & celeriter proſligetur & expellatur, motus in œconomia vitali non trepidi & torpidi, sed potentes sint, pulsus cordis fortis, celer, magnus, progressus sanguinis, calor naturalis, reliquarum fibrarum motus

auctus, intensus & impetuosus sit, ut & varii conatus expulforii, aut *excretorii* contingant: & sicut in iracundia animus *suo* impetu *extrorsum* ruit, ita motuum *vitalium* effectus *extrorsum* tendunt, *incalescentia* & colore *rubicundo* superficiei corporis, *oppletione* & larga translatione *sanguinis* in *peripheriam* transeunte ac *similibus* aliis effectibus: in *Terrore moralis* respectus occupatur circa repentinam *fugam*, abstractionem & subductionem ab objecto *inopinato* obruente & vel *actu*, vel *apparentur* pernicioso, cum subitaneo consilio se a tali objecto removendi & *occultandi*, sub momentanea destitutione & *jaectura* consilii, periculo opponendi, quare in *vitali* processu confestim repressio humorum ad *interiora*, ac virium præcox *jaectura*, instabilis, *tremulus* & titubans fibrarum motus, rigor, horror, pallor, frigus, oppressio & repentina *retentio* nonnullarum evacuationum, *lipothymia* &c. & similiter *conveniens* processus in *aliis* animi pathematibus succedit: exinde concludimus, si inter *alterationes patheticas* & *vitales* tam *exacta* intercedit *convenientia* etiam quoad *gradus*, destinationes & respectus *finales*, facile sequitur, quod *utrarumque una eademque* sit causa, & quod *anima suum corpus* non modo in *genere* movere, sed *variis* motuum *gradibus* afficere queat, adeo ut in *ordinaria* ejusdem actuatione & directione non *nova* & *obscura* causa, nullis luculentis & solidis argumentis demonstrabilis, supponi, excogitari & præferri debeat.

§. XIII.

Si itaque processus *vitalis alia* causa instruens & dirigens esse debet, quam hominis anima, mirum utique est, cur animi pathemata illum *turbare* possint & debeant; nam qui
con-

contra hanc dubitationem excipiunt, *Deum* hoc ita aut *constituisse*, aut *concessisse*, nihil probant; interim hæc sententia æque *captiosa*, ac *præjudiciosa* est, ac altera *parallela*, *Deum* etiam *constituisse*, ut anima sub *pathematibus* quidem suis *moralibus* corpus *alterare* queat; attamen in *ordinario* vitæ tramite & negotio illud *motibus congruis* afficere & dirigere *non* valeat: si quis contra *talem* interpretationem regerit, quod hæc adsertio tantum in *nuda thesi* consistat & *petitionem principii* oleat, tunc ulterius *defensio* theſeos reſonat, quaſi *crassis* ſenſibus obſervemus, animam ſub ſuis *patheticis* commotionibus eximias *alterationes* ſuo *corpori* conciliare, quale quid in *ordinario* vitæ & *ſanitatis* proceſſu annotare *haud* poſſumus; inde vero fluet hæc *argumentatio*, quicquid *crassis* ſenſibus & *effectibus* non comprehendimus in operationibus, *hominem* attinentibus, illud *veritati* conſonum *non* eſt; atqui motus *vitales* & *naturales* ab *anima* provenire, *crassis* ſenſibus & *effectibus* non comprehendimus. E. in qua argumentatione facile, vel *leviter* in arte ſuſumendi, *connectendi* & *concludendi* logica verſatus, regerere poterit, quod *veritatis* genuinus, perpetuus, *universalis*, abſolutus & *eſſentialis* character non ſit, comprehenſio phænomeni aut effectus *crassis* ſenſibus ac *ſignis*: deinde quod de *anima* utpote *ſpiritu*, non *absolute* valeat adſertio, quaſi in *omnibus* operationibus *crasse* procedere debeat, quæ contra, quia in *dignioribus* operationibus, videlicet *moralibus* & *ſubtiliter* & *crasse*, ideis *ſimplicibus* & *compositis* operoſam ſe probere poteſt, ita tanto magis in *vilioribus* & *indignioribus* negotiis æque *ſubtiliter* & *crasse* operari poteſt; hinc plurimæ actiones ſubitanæ ac vehementes,

sensualibus ac crassis signis se magis produnt, quæ vicissim leniter administratæ, in modo suo fiendi & ipso processu subtiliores & insensibiliores observantur, testimonio sudoris aquosi & transpirationis insensibilis &c. exinde liquet, quod anima facultatem a Deo concessam possideat tranquillius & impetuosius, fortius & moderatius, citius & tardius, subtilius & crassius movere; inde per justam connexionem valet, sicut anima in voluntariis & patheticis motibus fortioribus gradibus & crassioribus effectibus agilis est, ita in ordinario vitæ & sanitatis processu tranquillius, subtilius & lenius operatur: porro anima crasso processu in- & externos sensus perficere potest, vicissim vero subtiliter, acute, argute, profunde intime res intelligit, invenit, dijudicat, perspicit, gustat, olfacit, audit; quis vero ita morosus ac sciolus esset, ut dijudicaret, quasi has operationes in rudi & quadrato rustico anima perficeret; cur? quia crassis signis sese produnt, in Philosopho vicissim, aut homine delicato & sensibili Deum alium ordinem constituisse, ut, quia in iisdem hi actus subtilius procedunt, ea propter non ab eorum anima, sed ab ipsa instrumentorum materialium machina, sive conformatione, configuratione & structura, physico-mechanica dispositione prædita, proveniant & dependeant: alio exemplo iterum hæc meditatio illustrari & confirmari potest; si sanguis temperata fluiditate gaudet, moderata ac leni actione fibrarum strictoria in suo progressu servatur, si vero consistentia ejus spissior fuerit, tunc augetur ille motus, adeoque crassioribus signis & effectibus observatur; auctiorem hujus motus, ita dicti, tonici gradum administrat anima rationalis, in actione corporis voluntaria &

sub

sub *pathematibus moralibus*; quidni eadem poterit *leniorem, subtiliorem & mitiorem* gradum *ejusdem* motus in processu *vitæ ac sanitatis* efficere & producere? nam qui potest *magis*, potest etiam *minus*, quodsi itaque *distincta* horum respectuum observatio & conciliatio instituat, nec ex *crassis* phænomenis tantum dijudicatio conficiatur, facile *veritas* adserti mentem nostram illuminabit & confirmabit, siquidem anima, utpote spiritus, sive *immaterialis* substantia, non cum *prædicatis & qualitatibus corporearum* rerum confundi debet; *prædicata* enim suis *subjectis conformia* esse debent: & hic *eximius* est *error* illorum, qui ex *motu corporis*, in *corpus* & illico occurrentibus signis, phænomenis & effectibus, ad motum *animæ in corpus* frivole concludere solent: id quod etiam ad præsentem considerationem applicari debet.

§. XIV.

Illis argumentis, quæ assertum nostrum, quod *anima rationalis natura humana* existat, confirmant, annumeramus notatu dignam illam connexionem *gradus in moralibus & vitalibus* actionibus obvii; quæ observatio in disquisitione *Temperamentorum* sive *proportionis* motus *fluidorum & solidorum* in processu *vitæ*, & *proportionis* motuum *moralium* ad sua objecta obtingit: quodsi enim motus, ad œconomiam *vitam* spectantes, in uno individuo *fortiores, vehementiores, celeriores, agiliores & operosiores* fuerint, tunc in talibus subjectis *mores*, imo quælibet sensationes *in & externæ, similibus* præditæ sunt qualitatibus: & vicissim, si in subjecto aliquo motus *vitales* fuerint, *debiliores, segniores, tardiores, &c.* ipse *animus* in *omnibus* suis *moralibus* actionibus simili *gradu* qualificatus deprehenditur;
idem

idem non modo in hominibus de *Cholerico & Phlegmatico* participantibus sed & in *reliquis simplicibus* æque ac *mixtis* deprehenditur temperamentis: inde juste judicamus, quod, quia inter *utrosque* actus tam *exacta* obtingit *convenientia*, ita utrorumque unum idemque existat *principium activum*; deinde quia in utrisque operationibus *rationalis* occurrit *modificatio & proportionis* institutio ac determinatio, ita utrarumque *principium activum* non est *materiale*, sed *rationale*, quale in homine *non aliud*, quam *ipsa anima* hominis, existit. contra hanc demonstrationem *excipi*, *objici* & *regeri* posset, quod hunc *nexum ordinis & gradus*, inter prædictos motus intercedentem, non anima, sed *corporis physica* constitutio disponderet: at hæc interpretatio eminenter vitiosa & *erronea* est, siquidem pro *dignitate* animæ & *moderatione morali* militat, si *convenientiam* motuum moralium & vitalium causæ *principaliori* tribuimus, nec *nude passivæ*, prout corpus est, adscribimus: deinde juxta illam oblocutionem asserere deberemus, quod potentia qualitatuum *physicarum & materialium* superet facultates *spirituales*, quod adsertum omni *sobriæ philosophiæ*, *pneumatosophiæ*, imo *Sacro Codici* repugnaret; siquidem vires & virtutes causarum *spiritualium* multis modis *sic dictas vires* materialiarum antecellunt, ergo corporis machina cum *sua æconomia* vitali, sua potentia *sibi non potest* conformare operationes animæ; nam actio corporis in animam est nulla, quia corpus in prædicamento passionis, *sibi relictum*, stat, ergo nullo adminiculo *intermedio in animam* operari potest, quod tamen *factu necesse* esset, si *processus vitæ nude physicus* suppositus sibi assimilaret & conformaret motuum moralium dispositiones & progressus: actio vicissim animæ in corpus est

est manifesta & *realis* & *rationalis*, quia *anima* potest *per se movere*; *corpus non potest per se movere*; interim hoc *corpus motu indiget*; præterea etiam *ingenuæ rationi* repugnat, quod motus, ad *corporis æconomiam* pertinentes, possint active & *efficienter* animæ motus & operationes *mutare*, reformare & disponere, quia iterum quodlibet *corpus*, *perfectissimis* qualitatibus instructum, nullo medio animam *efficienter* afficere potest, ni supponendum & demonstrandum esset, quod corpus *sua sola virtute* movere, quod porro *hosce motus rationali dictamine in & ad animam* derivare & dirigere, quod insuper *firmiori* potentia *animæ vires subjugare & superare*, posset: Sed quis tam palmarias ac *fonticas* facultates citra crassum *præjudicium corpori* tribuere, adeoque causam *spiritualem*, contra omnem ordinem, qualitatibus *materialibus* subjugare & subicere mallet! & enim licet per *lapsum* eadem anima *perfectiorem* suam perdiderit, propterea tamen nulla ratione nullove argumento demonstrari potest, quod Deus *animam corpori* subdiderit, adeoque subiectum quoddam, videlicet *corpus*, quod æque per *lapsum* *perfectiorem* suam perdidit, *animæ utpote spiritui*, in *essentia* haud mutato & vires, *essentialiter* spiritui competentes, adhuc *possidenti*, *præpollente* virtute ac caractere designaverit; quippe qui & adhuc varii, respectus *repugnant*, quo minus *sobria* ratione asserere queamus, quasi *motus corporis* inverterent, in *suum ordinem* ac *gradum* ducerent & *activa* qualitate immutarent *motus morales*: quo *dignius* itaque subiectum est *animæ præ corpore*, quo *dignius* est prædicatum & officium *moralita-*

ralitatis præ *physicis* corporis attributis , eo *dignior* est conclusio & dijudicatio , sicut alias a *potiori* denominatio formari debet; hinc *animæ* relinquendum est *dominium* & directorium in *morales* & *vitales* operationes; quippe qui nervus præsentis demonstrationis est.

§. XV.

Militat porro pro nostra adsertione, quod *rationalis anima natura humana*, adeoque principium *vitæ* & *sanitatis* existat, eximiæ *dignitatis* argumentum & *quotidiana* ferme observatio, quod *intensiores* certorum *morum* exercitationes *evidentem* & non raro *præsentaneam* efficaciam in *diversas* functiones, *vitam* & *sanitatem* attinentes, exferant; hanc meditationem quadantenus illustrant & confirmant *dispp. Dn. D. Præsidis de Sensuum internorum usu in æconomia vitali, de Morum & Morborum consensu, de Medicinæ & doctrinæ moralis nexu, & de Therapia morali*; quam *moderatus* aut *immorigerus* quidam in *ordinariis* suis *moralibus* operationibus est, *simili* gradu in eodem *vitales* functiones qualificatæ sunt: *operosior* applicatio animæ ad negotia *intellectus*, ingenii, *memoriæ*, *judicii*, efficit, ut functiones *vitales debilius* procedant: quo *plus virium* anima ad labores *mentis* impendit, eo *minores vires* ad *æconomiam vitalem* applicantur: *ætas tenerior* vel *sponte* propensior & ardentior ad operationes *mentis*, vel per *institutionem* aliquando *morosam, rigorosam* & *coactam* easdem *intensius* exercens, aut raro *longinquius* vita & sanitate fruitur, aut magna *imbecillitate corporis, adversa valetudine, impedita* & *turbu-*

turbulenta *nutritione*, variisque *offensis* in processu vitæ laborat; hinc observatio omnibus ferme nota est, quod infantes *præmatura* sapientia & mentis *angustia* ac fervore instructi, *brevi* moriantur; ob id in pædagogia *prudenziori* consultum est, quo ingenia, alias operosa, præcipitia & *agilia* non valde *incitentur*, *urgeantur* & *delassentur*, neve alia *teneriora* & *sensibilia* nimium cogantur, alias non modo *vires animi*, sed & ipsa *œconomia vitæ* valde offenduntur: si itaque *anima* functiones *vitales* non administraret, tunc prædicti effectus *minus* evenirent; quid enim *animæ commercii* intercederet cum *corpore*, quando hoc in processu, ejus *conservationem* concernente, ab *alia* causâ actuaretur & dirigeretur: quo *magis* etiam homines adultiores *vires animæ* suæ ad operationes *mentis* applicant, eo *magis vires*, ad *corporis* œconomiam pertinentes, *hebetantur*; inde redditur *concoctio* difficilis, negotium *se-& excretionis* impeditius, *minusve* sufficiens, *progressus sanguinis tardior* ac laboriosior, *sanguificatio* *magis irregularis*, *nutritio* languidior, hinc oritur varia *intemperies* humorum, multiplex horum *stagnatio* aliaque *vitæ & sanitatis* offensio: contra vero contingit, ut homines non *multum mentis operosis* negotiis inhærentes, nec *ardua* negotia rationis suscipientes, sed sub reliqua *tranquillitate* & otiiis, in officiis *moralibus* adhibitis, *ventri* aut *corpore* *magis* servientes & indulgentes, *duriozem*, firmiorem & constantiorem vitam ac sanitatem possideant, testimonio gentis aut plene, aut semi-barbaræ, quam, si non alia valde *ominosa naturalium* causarum *intemperies*, aut *violentiæ* turbaverint & læse-

rint, *longinquius* suam vitam illa protraheret: quippe quæ causæ in resolutione *problematis*, cur quidam homines *distincte infrequentius*, ægrotent, aut cur aliqui *facilius morbis & morti* subjiciantur, advertendæ & conferendæ sunt: huc pertinet meditatio & observatio, quod homines *profunde*, intime, *intricate*, *operose* & *excessive* mentalibus & *moralibus* officiis occupati, *præmatura* quasi extinguantur morte, citius *defectum* virium in *vitæ & sanitatis* processu experiantur, insuperque probe causam *accelerantis* enervationis & *seneclutis torpescentis* agnoscant, sie hätten viel Kopff-Arbeit gehabt, sie wären sehr früh und streng zu studiis gehalten worden &c. inde etiam est, cur tales *mente valde*, nimiumque studiosi & *operosi* homines, si in *morbum* quempiam incidunt, aut *tardius*, aut *difficilius* ab eodem liberentur; ea-propter illi, qui ridiculo Zelo *naturæ officia* summo prosequuntur odio & magnam *Dianam corporearum* qualitatum adorant & venerantur, *seriose* dissuadent, ne post *ciborum ingestionem*, profundæ meditationes suscipiantur, ne forte *fabulosus* & lepidus ille *Spirituum* influxus impediatur! sed unde? sane non aliunde, quam ab *eadem anima*, *mentalibus* suis operationibus valde *negotiosa*; quæ ipsa *tergiversatio*, hæsitatio & ratiocinatio per *ambages* ac *imaginaria* supposita, tandem sub *primo impulsu* & *ultimo directorio*, *animæ protectorium* suum quærit: exinde vero liquet, quanta sit *consensio* inter *morales* & *vitales* actiones, *quotidianis verissimis* phænomenis evidens, quibus satis manifeste probatur, quod *anima rationalis* de singulis prædictis functionibus, ad vi-

tam

tam & sanitatem spectantibus, *præsidium* adeoque *jure meritoque* officium Naturæ humanæ teneat; hinc inclarescit, quod si *uni* actui, sive *moralis* sive *vitalis* fuerit, ipsa *plus* incumbat, alter *non æquali* ut plurimum gradu & tenore exerceatur; *qualis ratio & relatio* in *aliis* actionibus humanis, ab *eadem anima* administrari solitis, occurrit, ut exinde *firmitatem* ac *certitudinem* conclusionis ducamus, quod videlicet utriusque & *moralis* & *vitalis* operationis *una eademque* sit causa; quæ adseritio non modo præfenti, sed & præmissis & adhuc aliis multis rationibus & observationibus confirmari potest.

§. XVI.

Quanta porro vis *imaginationis* sit, in motus, ad *vitam & sanitatem* spectantes, *augendos*, *minuendos*, *invertendos* & *emendandos*, innumera testantur exempla, adeo ut ad *imitationem* eadem imaginationis efficacia in foro *therapeutico* ad restituendam ac confirmandam sanitatem usurpetur; cujus observationis *Dn. D. Præses* uberiorem fecit mentionem in *dispp. de Phantasiæ usu, lusu & abusu in Medicina, de Valetudinariis imaginariis, de therapia imaginaria*; & hujus imaginationis *magna* utique *vis* est, qua *singuli* motus ad œconomiam *vitam* pertinentes mutari possunt & solent; quid quod interdum mediante *imaginatione* tales in *corpore* producuntur effectus, quales *nulla* causa *physica materialis*, aut qualitercunque *artificiosa*, elicere potest; hinc quidam medici tales effectus, *archealibus*, *mumialibus*, aut *magneticis*, aut plane naturaliter *magicis* potentiis adscribere solent: sicut ve-

ro actus *imaginationis* non est *liberi* respectus, i. e. ex se dependens, aut *independens*, sed a nulla alia causa, quam *anima rationali* provenit, ita hæc anima juxta *imaginationis* suæ normam, quam ipsam & format & imitatur, tales mirabiles aliquando effectus in *toto suo corpore* & quidem nec sibi de ipso actu *conscia*, nec *volens*, producit; & si illa anima *extraordinarie* in processu vitali *peculiares* & singulares operationes administrare potest, quidni in *ordinario vitæ* statu tale quid perficere queat, sicut nulla solida ratio constat, quod animæ tantum in *extraordinario* casu concessum sit, in *salutem* sui corporis, instigante, ministrante & interveniente imaginatione certos effectus *in & cum* suo corpore prodere & producere; ob id etiam in *interpretatione* & explicatione talium *singularium* effectuum, illi, qui alias causas ex *materialibus* potentiis ac qualitatibus proferre & applicare solent, patrocinium & protectorium sub tali vi imaginationis quaerunt, ac necessitate coacti, cum aliam rationem allegare nesciunt, ni risum movere malint, ad animam convolant, eique tunc demum, *obtorto* licet collo, vim & jus mutandi motus in corpore citra actum *cogitationis* aut rationis *reflexivum*, vel præfigurationem & repræsentativam conscientiam, ut & citra arbitrium & *voluntariam* destinationem & deliberationem, tribuunt & adscribunt: & quo magis effectus illi, *imaginationis* interventu producti, ratione *singularis inventionis*, *exactissimæ directionis* & *exquisitæ executionis*, *ordinarios* actus & processus superant, ita eo magis a *majori* ad *minus* concludentes, tueri & defendere possumus, quod in tacito, placido & ordi-

ordinario statu & tramite illa anima *consuetas* actiones *vita-*
les administret; odiosum & factiosum enim prodit
 præjudicium, *si non aliter* animæ potestatem & activita-
 tem in œconomiam vitalem admittere & agnoscere veli-
 mus, quam si nostræ explicationes vacillant, titubant,
 delinquant & nobis ipsis *ridiculæ* & *erroneæ* comparent;
 facile itaque talem morositatem & repugnantiam susce-
 ptam reddit, si in judicando talem ac tantam fugacita-
 tem, nugacitatem & levitatem animi proderemus: &
 si vis *imaginationis* efficax est in *formatione*, *reformatio-*
ne & *deformatione* corporis, cur non *ejus principium*,
 videlicet anima, in *reliqua* corporis administratione *acti-*
um esse queat soleatque? interea ipsa imaginatio, ut-
 pote actus *rationis*, *tales* effectus, in *corpore* obtingen-
 tes, proxime & *immediate* perficere haud potest, sed
 causa imaginationis principalis *efficiens*, sine interventu
causæ materialis, ope & ministerio *illorum* motuum, qui
 cum corpore *convenire* & congregari possunt & solent,
immediate & proxime, eosdem effectus producit: hinc
 inutiles *ambages* & *fictitias intermedias* causas vitantes,
 proxime ab *illo principio* hosce effectus deducimus &
 demonstramus, a quo nihilominus in alia *imaginaria*
 causarum connexionione totum talem processum derivare
 deberemus: v.g. si adfereremus animam hosce effectus,
 imaginationis actu operosam, mediante famoso illo sub-
 tili fluido æthereo nerveo præstare; quæ demonstratio
 respectus non modo *fictitios* insereret, sed & per inuti-
 les *ambages entia præter necessitatem accumularet*, ut a-
 lias difficultates non moveamus: imo uti imaginatio in
 nego-

negotio *generationis*, *morborumque* *spontaneæ sanationis* &c. *distincte efficax* & *operosa* est, ita eadem non minus per *totum reliquum* vitæ *processum* *agilis* & *negotiosa* esse observatur; Et hæc demonstratio, præcedentes non modo *numero adauget*, sed & *valore confirmat*, nostramque sententiam roborat.

§. XVII.

Quodsi porro Rationalis Anima in *principalioribus* suis *intellectualibus* & *moralibus* negotiis *vigorosa*, *vegeta*, *alacris*, *moderata* & *ordinata* fuerit, tunc utplurimum *similibus* qualitatibus *œconomia* *vitalis* prædita observatur: quodsi illa quoad *morales* operationes, *confusa*, *perversa*, *turbulenta*, *insensibilis*, *furibunda* & *impetuosa*, per causas præcipue *morales* evadat, tunc *parili* qualitate *motus* & *functiones*, ad *vitæ* & *sanitatis* *processum* pertinentes, instruuntur: si per ætatem, aut prægressos *arduos*, *intricatos*, *multos* & *difficiles* actus *mentales*, anima *torpescat*, tunc æque totum negotium *vitale* *languescit*, quæ principalis causa est, cur appropinquante, instante, aut præsentente senectute, vires *naturales* *deficiant*, corporis firmitas *minuatur*, *fibræ* *exarescant* & *obrigescant*, totum corpus *marcescat*, *vigor* *universus* *naturalis* *pedetentim expiret*, indeque *præparatio* ad mortem naturalem obtingat, ut huc merito referamus verba *Illustr. Dn. D. Stablii* ex ultimo & nuper edito ejus scripto, cui titulus *de motus hæmorrhoidalis & fluxus Hæmorrhoidum diversitate* in *Præmonitione generali* p. 14. *quamvis enim ante oculos positum sit, quod per*
seni-

senium tam corporis structura, veluti marcescat; quam ipsius naturæ alacritas quasi lassari sentiatur; quin ipsius animi vigor sensim languescere videatur. Non potest tamen horum eventuum, quantumcunque veri sint, vera aliqua & perspicua positiva ratio demonstrari, cur inquam non eadem vis, idem vigor, eadem alacritas, quæ usque ad consistentem ætatem legitime augefcere sentitur, non in illo, veluti completo statu, usque in tardam senectutem, imo in perpetuum continuetur: unde nihil remanet, nisi necessitas agnoscendi, quod finito agenti, etiam fines seu termini activitatis suæ præfiniti sint, quibus circumscribatur: quodsi præterea anima repente in extremam perturbationem ac confusionem moralem devenerit, subito etiam œconomia vitalis in similem extremam perversionem ac exorbitantiam, cum insequente subitanea morte ruit; testimonio mortis ex gaudio, metu, mœrore: quodsi eadem anima momentanee in suis moralibus actionibus delinquat, confestim etiam motus, ad vitam & sanitatem spectantes, delinquunt, testimonio affectuum syncoplicorum & lipothymicorum, quare Garmannus in mirac. mort. Lib. 2. tit. 7. §. 125. dicit: præsentia animæ, animat, sive vitam conciliat, absentia mortem: Isidorus Lib. 3. cap. 252. Corpus præsentē anima vivit: & recedente anima corpus mortuum manet. Porro consideratu digna hæc etiam est observatio, quod interdum anima de sui corporis statu peculiare reflexiones imaginativas, sibi tamen nec de hoc actu conscia, nec voluntario eundem instituat, quando vel de ubertate aut motu, aut difficili progressu & stagnatione, aut alia qualitate, aut co-

natu *excretorio* certorum *humorum nocturnas phantasias* & *insomnia*, cum prædictis respectibus exacte *cohærentia*, format, id quod multis testimoniis & *veteres* & *attenti* ac a præjudiciis liberi *recentiores* medici confirmant; ubi juxta superius allegatas & prolatas nostras meditationes ac demonstrationes *erroneum* adsertum esset, si rationales respectus ac ordines confundere & *invertere*, adeoque judicare velimus, quasi *materialis* dispositio, constitutio & qualitas corporis tales *phantasias* efficienter *animæ obtrudat*, aut extorqueat, quæ sane lepida esset philosophia, quoniam jus & actio *immediata* corporis in animam prius condigne & prudenter *demonstrari* debet; haud enim æquipollens aut *reciproca* valet conclusio, *sicut anima in corpus*, ita *corpus in animam* jus activitatis, aut influxus *moventis* habet: Præterea singularem annotationem & disquisitionem meretur observatio *præsagiorum* naturalium, quæ anima multoties de *corporis* & *vitæ* ac *sanitatis* statu format, videlicet de ingruente *morte*, quando adhuc homo *nihil morboſi* sentit, de appropinquante *morte*, quando homo adhuc *sanus* est, de impetranda *sanitate*, quando homo in summo *vitæ periculo* sub morbo quodam fluctuat, de *certò* eveniente *morte* ac *die mortis*, quando æger adhuc in *tolerabiliore* sui morbi statu versatur &c. *vid. Dn. D. Præsidis disp. de Vaticiniis ægrotorum*: quæ singula contingere haud possent, si anima in *ordinario* & *extraordinario* statu œconomiae *vitalis* Præsidium ac Directorium minus gereret: sed in ultimis hisce momentis paulo magis *brevitati* operam dedi-

dedimus, ac pariter in præcedentibus *succinctam* propositionem adhibuimus, ne tota deductio ultra consuetos limites progrediatur: interim *nonnullis argumentis* thema nostrum probavimus, confirmavimus & *demonstravimus*: adduximus *rationes* in *realitate* existentes, non in *figmento* & speculatione consistentes, insuper *tales* quæ proxime & *genuine* ad *hominem* pertinent, nec *confuso* modo corrasæ: ex *illis fundamentis* a nobis prolati facile exercitatæ mentes (quæ non philantia occæcatæ *lucem* pro *tenebris* malevole denigrant) *specialissimam* applicationem formare poterunt: *multis* adhuc rationibus nostra adsertio probari potest; ast qui *præsentibus* non attentum præbet animum, eadem *morosa* repugnantia plures alias advertet: capiat itaque propositionem nostram, qui vult & qui potest, nemini illam obtrudimus: prudentis vero animi character est, omnia attente & *judiciose* scrutari, nec sciole ac ludicre spernere; acquiescimus ea propter in hac *succincta* præsentis thematicæ explicatione: DEUM rogantes, ut veritati huic sua benedictione porro adsistat, efficiatque, quo a pluribus, uti hæctenus a multis factum, agnoscatur, & in gloriam nominis divini proximique salubritatem applicetur, quippe qui etiam præsentis laboris nostri sincerus est

F I N I S.



